

ديوان

صحوة ضمير

بقلم

سعيد عمر أبو برين



مكتبة حبيب رة الورد

بطاقة فهرسة

حقوق الطبع محفوظة

مكتبة جزيرة الورد

اسم الكتاب : ديوان صحوة ضمير
المؤلف : سعيد عمر أبو برين
رقم الإيداع :
الترقيم الدولي :

الطبعة الأولى ٢٠١٧



مكتبة جزيرة الورد

القاهرة : ميدان حليم خلف بنك فيصل
ش ٢٦ يوليو من ميدان الأوبرا ت : ٠١٠٠٠٠٤٠٤٦ - ٢٧٨٧٢٥٧٤

الست دي مين

(١)

الست اللي عدت ورمت السلام
الست اللي كانت قليلة الكلام
الطويلة العريضة رفيعة المقام
اللي كان فوق دماغها يطوف الحمام
اللي ساحبة حصانها وشدة اللجام
وماسك في آخر ديلها الغلام
ورافع دماغه بيلافي الحمام
وحاسس في ماسكة ديلها بأمان
اللي بتبكي وتضحك في نفس الألوان
وخبث عندها لأحسن دموعها في لحظة تبان
باشبه عليها كأني عارفها بقالي زمان
اللي شايلة في كل دقيقة جنين
وفاردة جناحها بتحمي السنين

اللي كانت بتنعس وخايفة تنام
وكانت بتحرس ليكو الخيام
اللي عمرها كان من عمر السنين
حد يقولي الست دي مين
الست اللي قالوا عليها أميرة
اللي عجنت سعادة في وسط الخميرة
اللي كانت تعولكم وقولتم عويلة
اللي فرشت قلبها ليكو نجيلة
الست البهية الجميلة النبيلة

(٢)

اللي كنتم ليلاتي تناموا في عنيتها
ولو جه النهار ودايق عنيكوا
كانت رموشها تضلل عليكوا
وكانت تشقر تطبطب عليكوا
ولما احتاجتكم بسرعة اتواريتو

الست اللي لونها لون السمار
اللي كانت طويلة بطول الفنار
اللي رفضت في لحظة تسيب الديار
وخببت شعورها وأينها بخمار
اللي غسلت بإيدها وش النهار
اللي عرق ايديها يزهر عمار
اللي انتوا أهلتو عليها التراب
فمشيت حزينة عليها الغبار
وخببت همومها في ستر الضلام
اللي ياما علمتكم الحلال م الحرام
فقمتم لعبتوا عليها القمار
الست اللي زالت عنكو الهموم
وغزلت حنانها ليكو الهدوم
واللي كان بيحوم حواليتها النجوم
واللي ياما سرقوا منها العلوم

وخببت عليهم سر الآثار
ألاقي حد هنا من أصولها
الست العفيفة اللي ليها كرامة وعاززة تصونها
(٣)

الست اللي حاولوا يعرفوها
وفضلت بتجري لحد يطولها
اللي قالت أموت ولا أعيش يوم بدونها
واللي كان وازر عليها حد من بطونها
عائش في خيرها بس كان بيخونها
أكيد انتوا عارفينها
الست اللي فيكم ملامح منها
الست اللي فاكراكم وانتوا ناسينها
واللي حمياكم وانتوا ساجنينها
الله يصببرها / الله يعينها
أنا دلوقتي عرفتها

لما قربت منها
ورفعت البيشة عنها
فعرفت ليه كان صبرها
عشان التاريخ في وشها

وتسأليني من أنا

(١)

وتسأليني من أنا
يا من عشقتي الذات وعشقتي الأنا
أنا من أحبك ذات يوم يا فتاة
ولم تكن عينك تراه
أنا قصة عشق في زجاجة
ملقية على شط بحرك في المياه
تتقاذفها أمواج بحرك
عند قدمك وتنظرين
دون انتباه
وتسأليني من أنا
أنا كنت طائر حر
أغرد بين أشجار الحياة
أبحث عن أنيس وقلب
حنون يهواه

إلى أن أصابني سهم حبك
كان حُسنك يومًا قد رماه
فانزرع حبك في قلبي
وتكفل وجهك بالنواة
وتسأليني من أنا
أنا من خاصمه النوم وجفاه
أنا من شاب وهو في صباه
أنا بسمة في عين عشق
أنا حرٌّ من بعد رق
أنا عبدٌ من بعد عتق
أنا شمعة كانت تضيء لك الطريق
بل كنت الطريق إن أردتي
يومٌ رفـيـق
وكنت الهواء إن أردتي يومًا شهيق
بل أنا الغريق في بحر شوقك الحريق

(٢)

جعلتيني كالنار في الهشيم
 أصبحت سمكة بلا خياشيم
 وتسأليني من أنا
 أنا قلب طرق بابك العنيد
 فلم يجد من يسمع أو يجيب
 فأصبح روحٌ تحلق من بعيد
 وأصبحت الحارس عليكي كالعبيد
 خوفًا عليكي من التطفل أو البرد
 أو الحر الشديد
 وتسأليني من أنا
 أنا الشيء ونقيضه
 وليس له أمل يعيده
 فأنا الناعت والمنعوت
 فأنا الكلام وأنا السكوت
 أنا من تعرى ولم يجد ورقًا للثوت

أنا المجروح بل المدبوح والدمع المكبوت
أنا الطيب والحنون وأنا الجبروت
أنا دمة
أنا دمة في وقت جفت فيه الدموع
أنا الهائم بين الطرقات والربوع
أنا القتييل وليس للقتيل رجوع
وأنا الدنجوان وأنا الجربوع
أنا مولود فقد أمه ولم تراه
فليس له سبوع
كنت لكي اليوم الثامن في الأسبوع
ولم نجد له حروف
أنا من تكالبت عليه الظروف
أنا من لم تعيريه اهتمام
يوم التقى العينان
فتهدم به البنين

(٣)

وتسأليني من أنا
أنا من دمرتيه بالأنا
وعشقتي ذاك في المرأة
أنا من أحبك ذات يوم يا فتاة
ولم تكن عينك تراه

راح حبيبي

(١)

النهاردة بتمر ذكرى
ذكرى اللي كان يوم بسمتي
ذكرى واحد كان شريكي
وكان في قلبي ومهجتي
خطف حبيبي الحق مني
وفي لحظة أنفضت شركتي
راح طريق مالوهش راجعة
بس طريق نهايته واجعة
سابني وحيدة وطفى بسمتي
رغم أنه حق ومفيش مخلوق
يقدر يقوله في لحظة لأ
ما بحبهوش/ ما هو اللي طفى شمعتي
اللي راح دا يبقى نصي

نصي اللي عشت في جنته
 اما نصه لسة عايش
 بس مات على فرشته
 ماتت مشاعري كلها
 ما فضلش منها إلا سهره ودمعته
 يعني اللي كان قاعد قصادي
 واللي عمره ما اعترض وعاش حياته وهو راضي
 واللي كنا نروح معاه
 كل المصايف والنوادي
 واللي عمره ما دخل علينا وهو فاضي
 واللي عمره ما نسي
 يوم عيد ميلادي
 كل ده دلوقتي ماضي
 كل دا تفتكروا ممكن يبقى عادي
 أنا حياتي كلها وقفت إلا عن السيرادي

(٢)

حتى كرسية بقى مشغول وفاضي
مشغول بروحه رغم أنه فاضي
راح ونيسي راح جليسي راح حديثي
راح اللي كان جوه قلبي في يوم حبيسي
مش أي حد تقول دا راح
اللي راح هو اللي ساب ذكرى حلوة واخطفى
اللي عمرك ما شوفت منه في يوم جفا
اللي كلامه لينا كان مرهم شفا
يا خسارة راح
بس ساب لينا الجراح
فين بسمته ساعة الصباح
كم من صباح بعد ما راحت بسمته
أنا حاسة في الصباح بضلام
ما هو مات معاه معنى الغرام

ما هو خد معاه حنيتة
فين داخلته بعد الغياب
والفرحة في عيون الولاد
والشمع في عيد الميلاد
هو الوحيد اللي انطفى
في لحظة راح منى أختفى
حبيبي راح وسابني وحيدة للنواح
كنت خدامته وكان خدامي
كان بيوحشني وهو قدامي
عمره ما اختفى ولا في منامي
طول عمره كان عايش في حاله
لو جرس الباب ضرب
باجري بسرعة فتحاله
دلوقتي بقول الفاتحه له
حبيبي راح في غفلة منى الموت جاله

(٣)

مستنـيـه دوري
عشان أقول أنا راـيـحـا له
أحياناً با تخيل أنه عايش
وأنه راح في مأمورية
وفي أي لحظة ممكن حيـخـبـط عليا
وعيني ع الباب قاعدة مستنية
وناسية صورته اللي كان
حاططها بايديه
وعليها شريطة سودة
للأسف أنا اللي حطاها عليه
وأفوق وأقول حبيبي راح
أتاري عقلي كمان دا راح
لأمتي يا رب ح أفضل أعاني
دا صوته لسة بيرن في وداني

صوت ضحكته / صوت كحته
 دي بدلتته / ودي شنتطته
 ودي نظارته / أناشايلة آخر عقب في سيجارته
 أيوة لفاهها ويا طفائته
 كان زينة والله في دنيته
 على فكرة / أنا لسة بالمع جزمته
 حتى البالطو اللي متعلق هناك
 أيوة يا بالطو أنا مش نسيك
 حطوا عليا في يوم مطر
 وبيقولي وهو بيرتجف
 مش عارف جسمي مش طايقه ليه
 وأنا حاسة بالكذب في عنيه
 كانت إيديه متجمدة
 شيلت البالطو وحطيته عليه
 فيه زي ده / فيه حب كان بالشكل ده

(٤)

أنا كنت محسودة عليه
حتى لما أنام بانسى أنه راح
وأبص بسرعة على مخدته
بالأقيها مكسورة الجناح
حزينة على يوم فرقته
كان ستر ليا وكان غطا
مش ناسية ليلة خطبته
لما رسي عليا العطا
أنا لسة لابسة دبلته
أنا فاكرة ليلة حنتي
كنت مشغولة بحنته
أكيد ليلتها كان ملاك
نفسى أخلص حنتي وأروح هناك
خد عقلي مني في حنتي

(٥)

كان أنيسي ودني تي
كنا شكل واحد في الطباع / حتى شركا في الصداق
عمر ما حد فينا جاع
بنشبع لما نبص لبعضنا
عمر ما أترفع الدراع
إلا في بق بعضنا
يا يأكلاني يا أكله / وسنانا هايمه زينا
لحد ما نعض الصباع
كنت باشرب من حنيته
أحلي من نظرة هيام
بس في لحظة مني ضاع
من غير ما يقول الوداع
كل شيء دلوقتني ماع
حتي أي كلمة بتواسيني

بحس ملفوفة في خداع
معظم كلامهم كان رياء
الكل عايش دنيته / علشان ما حسش بالفراق
وأنا لسنة عايشة في دنيته
في جلسته / في أكلته / في لما كان زعلان وراق
عايشة على الماضي بتاعي
مع اللي مشي من غير وداع
هي دي ذكرى حبيبي
اللي كان يوم بسممتي
بس راح / حبيبي راح
مشي وساب ليا الجراح

الدنيا مليانة تجارب

(١)

الدنيا مليانة تجارب
فيها نماذج وعجايب
بتمر على الصبي والشايب
فيها اللي اتعلم من بصة
واللي سمعها في يوم قصة
وفيها اللي مهما تقول خايب
رغم الزمان بيدرسها
والدنيا مليانة عجايب

واحد رزين وفارض نفسه
والتاني رغم حضوره غايب
ناس تشوفها ذهب أصلي

موجودة معاك وسط الأزمة
وناس كتير ملهاش لازمة
ناس تتعبا في زكايب
والدنيا مليانة عجائب

وناس بتحبك كده لله
والحب معشش جواها
نفوس سبحان من سواها
وناس تتبسم وعقارب
ومن وراك سم ودايب
والدنيا مليانة عجائب

(٢)

وواحد حريص على شقا عُمره
والتاني ماله مال سايب
أهمل لحد م أداين
وبقى أجير عند الخاين
وبقى مرعوش منه وهايب
والدنيا مليانة عجايب
وناس في وشك تضحك لك
ومن وراك بتفحتلك
ومعتبرهم أصحابك
وكل يوم جوه في دارك
تخرج وتنهش أعراضك
ما هو اختيارك كان عايب
الدنيا مليانة عجايب

افرز تملّي في أصحابك
مش كل اللي خبط على بابك
يبقى حبيب علشان زارك
يمكن يكون بيخطط لك
وغرضه يخربلك دارك
خليك حريص لتكون خايب
دي الدنيا مليانة عجائب

(٣)

واوعى حد يفكرلك
لأحسن يكون بيعكرلك
وغرضه راح يتصدرك
خلي القرار يبقى قرارك
مش تبقى لعبه بتتحرك
راح تستفيد من تفكيرك

لو حتى فكرك يوم ضورك
بس اوعى حد يفكرلك
دي الدنيا مليانة تجارب
بتمر على الذكي والخايب

وواحد بيحترم ذاته
وواحد همه ملذاته
وبيصرف من ورث اخواته
بعد ما ضيع أملاكه
وممكن يكون راجل شايب
والدنيا مليانة عجائب

ولو حبيت في يوم واحدة
اوعى الوسيطة تكون واحدة
لتكون مخدوعة ومجروحة

وعلى الأحباب دايماً جاحدة
خلي الوسيط هي عيونك
عمر عيونك ما تخونك
ما هي وقلبك حاجة واحدة
ما دمت في الحب دا دايب
والدنيا مليانة عجائب

(٤)

اوعى يا بني في يوم تغتر
الدنيا فيها الخير والشر
بس انت لأيه راح تنجر
اغرف لضميرك واوزن له
وشوف ضميرك ايه يميل له
لو مال للخير كيله
لو مال للشر بينله

الشر ما فيش أسهل منه
بس فعل الخير أعظم منه
لو جالك الشر ابقى اتجاهله
لو حتى عدوك يستاهله
ولو شفت الخير ابقى اندهله
انشا الله يجيلك على مهله
لو حتى اديته لغير أهله
اوعى تنسى انك أهله
الدنيا مليانة تجارب
بتمر ع الذكي والخاب

ياللي الرجولة مخبيها
وماشي في الدنيا مقضيها
وكل واحدة تلاغي فيها
بنات كتير ماهش ساهله

قارية دماغك مش جاهلة
تشتغل تشغل شغل تعالب
والدنيا مليانة تجارب

(٥)

وناس مربية دقونها
عملالها قيمة وبتصونها
وناس بتسترزق بيها
وناس بتختفي جويها
بتغسل بالدقن ماضيها
وناس ملطخة دقونها
لو فيه أمانة بتخونها
ومال اليتيم جوه بطونها
ولفظها الله غالب
والدنيا مليانة عجائب

وناس بتحلل وتحرم
وتستحل المتجرم
لو ليها حاجة تحللها
ولو عليها تحرمها
بتقيف كله على حالها
فاكرة الدنيا بقيالها
المغلوب خليته غالب
والموجب زي السالب
وكل حاجة وليها قالب
والدنيا مليانة تجارب
بتمر على الصبي والشايب
فيه اللي بيتعلم منها
وفيه اللي حيفضل كدة خايب
والدنيا مليانة عجائب

جمر الدار

(١)

كيفك يا جالبي يا جمر الدار
يا نجم ساطع في عز النهار
يا مخلبط وساحر عجول الشباب
يا جاتل جلوب جوه الديار
جولنا مالنا مالنا
فيه حد حابسك - تكونشي زعلان - ولا تجلان
بجلنا كثير ما سمعنا صوتك
بجلنا كثير ما خبرنا حالك
اتو حشنا
طمنا عليك - كيف أحوالك
لو زعلان يبجي وصالك عني كلام
اكيد مش زين
اوعى تصدجه - دا أنت الجلب ونور العين
دي أكيد عين وعين مؤذية

عين وصابتنا - وجلبت حالك
ولو تجلان ما هو من حاجك
جوه الكفر ما فيه في جمالك
ما هو الجمال ترك الكل
وجه على كلك وطى وباسك
وكممان جام أتمر مغ بيك
واتعافى وداسك
والله ما ساب حنة فيك
من أول راسك حتى مداسك
حبنا كنا اندوب فيه وبنشربه
مرة في كاسي ومرة في كاسك
وكننا نجول دا فرض علينا
ونأديه ونجول دي مناسك
والله أنا رايدك ولو زعلان
وطي يا سيدي أبوسلك راسك

(٢)

احـتـرت مـعـاك
 لسـاك تـجـلان
 شـكـاك غـاوي تـعـيش فـي مـآسـي
 والله بـجـيت فـي الـحـب دا جـاسـي
 والله ومـشـتـا جـالـك
 مـشـتـا جـالـك – سـوـيـلي حـجـة – جـابـلـني بـرة
 ولو لـمـرة – طـمـنـلي جـابـي – الـغـي وسـواسـي
 شـيـل الفـكـر مـن جـوة راسـي
 دا أنا رايـدك يا اـبـو جـلـب جـاسـي
 خـايـف تـخـسـر فـي يـوم وداـدي
 ولا تـخـسـر فـي يـوم حـمـاسـي
 جـابـلـني بـرة ولو ثـوانـي
 المـح خـيالـك إنـشـالله طـالـه
 ويـفـضـل خـيالـك جـوة عـيـني
 واجـفـل عـلـيـه بـرمـوش عـنـيا

ولما أريدك أرحح دموعي
وأجيب خيالك من جوه نني
جولنا مالك
فاكرة زمان أول مرة أنا شوفتيك فيها
لما أتجابلو عنيكي بعنيا
لمحتك وانتني بتسرجي مني الشوفة
وكنتي خارجة برة الدار تملي المية
شوفت في عينك يومها البسمة
وكننت ما أصدج إنها ليه
وكننت ببص ورايا بسرعة
لتكون البسمة - لغيري مرمية
وكانت الفرحة تدب في جلبي
لما ما لاجي حد ورايا عالزراعية
وفضل الوش وصورة البسمة دول في خيالي
وكمان كانو جوة في صدني على الطبلية

(٣)

وأمي تجولي مالك يا وليدي
 ليه مايتاكل
 سرحان ليه من الفجرية حتى عاشية
 وكنت ما أصدج
 ان تكوني في يوم غير ليا

فاكرة يا عاجلي
 مرة جابلتك عند الساجية
 وكنتي سارحة وما أنتش رايجة
 وكانت دموعك ساجية خدوك
 سألتك مالك - جولتي مرار
 جاني عريس وجالنا الدار
 جولت ساعتها والله ما يلمح طرف كعابك
 أو يلمح توبك برة الدار
 عندي سلاحي بتاع الديش

لو فكر ياخذك أو فكر فيكي
في عز نهار لأضربه بالنار
جولتي ساعتها راح أجول لأمي
تجنع أبويا بالتعليم وأنا لسة صغار
وفاكرة لجانا تحت التوتة
كنت أتحايل تديني واحدة لحد ما نكتب
أصبر نفسي
وكننت أجولك
جايدي واحدة طب عالنوتة
كان وشك يحمر وتجري بسرعة عالزراعية
وكننتي تجولي يا نهار حوسة
أديك واحدة طب دي الواحدة
بجتلة - وموتة
جال عالنوتة
وانتي بتجري ترميلي واحدة كدا بإيديكي

(٤)

وكننتي تُجولي خد من إيدي وأملى النوتة

والله وهانت يا جمر الدار
فاضل في ديشي حوالي شهرين
وحتبجي نصيبي وأحط غويشة جوة إيديكي
وحاخذ بدل الواحدة متين
وأملى النوتة بس بحج
مش في الهوا - كدا بإيديكي
وبعد ما نكتب تيجي في داري
وتبجي نصيبي يا جمر الكفر
يا جمر الدار

العيلة

(١)

العائلات ايه اللي جرالها
مين اللي قطع أوصالها
شيطان وجهه خبط زارها
وقعد وربع في ديارها
يا ناس عقولكم راحت فين
مين اللي جالكم خربها
ضيعتوا للعيلة وقارها
لما بوحتوا بأسرارها
مالهاش كبير علشان تكبر
دا كان الكبير يبصرها
طب شوفوا مين اللي كارهكم
ومين اللي كان بيعاديكم
بعد ما كنتم ايد واحدة

وكان الجدار بيداريكم
دلوقتي بتاكلوا في بعضيكم
دخلتوا ليه شيطان بينكم
يا ناس دا غرضه يأذيكم

(٢)

فين احترامكم لكبيركم
دا الكبير كان بيزينكم
بكره يا صغير تكبر
ويجي اللي بعديكو يهنكم

العياله ايه اللي جرالها
فين الأخلاق مين جه زالها
دلوقتي كله كبير حاله
وكله استكفى بعياله
والعيال نفْسُها كبرت

فيه اللي اتكبر على عمه
واللي اتكبر على خاله
والبت تشتم في خالتها
والواد يبجح في أعمامه
ما العيل اتغر بأهله
والأب والأم اتساهلوا
هو الأدب والعيب زالو
ما هو الكبير الفاتحه له

(٣)

العيله ايه اللي جرالها
شيطان وقطع أوصالها
الواحدة تصدق لبناتها
وتكذب لو حلفوا أخواتها
وتصدق في أخواتها وشاياه

وتلقح في الراححة وجاية
والدم بقى شوية مائة

العيلة ايه اللي جرالها
هي الفلوس بتغيرها
ليه الفلوس بتغير ناس
هو انتو نسيتمو دوران الكاس
ماهش شطارة كانت منك
دا اختبار من رب الناس
قادر ياخذها ويذك
بلاش تتعالى بفلوسك
يا خوفي الدنيا في يوم تقلب
واللي اتكبرت عليه تجيله

(٤)

دا أول واحد حيدوسك
والفقر ح تبقى أنت عميله
قولولي فين صلة الأرحام
وليه الاحترام بقى للأرقام
والي معاه فلوس أكثر
الكل ينافق فيه يوماتي
لكن الفقير الله يعينو
كل القرارب دلقينه
ما هو الفقير قطر تعبان
لكن الغني قطر بريمو

العيلة ايه اللي جرالها
دس الشيطان ايه في جرابها
حياة وسمها في نيابها

سم الغرور جه لشبابها
وسرح وعكر في أدابها
بدل الكبير ما ينول تكريم
الواد يقول على أبوه دا قديم

(٥)

وفكر أبوه محتاج تقويم
لما فكره ماهوش عاجبك
عاش في خيريه ليه يا لئيم
العيلة ايه اللي جرالها
شيطان جه ع الرحم شاطه
شوفتوا اللي ماشي ورا مراته
وقطع الرحم مع أخواته
شهوور ما بيسأل عن أمه
وكل يوم عند حماتو

العييلة ايه اللي جرالها
ما بقاش فيها ليه أحاسيس
أخباركو ليه منشورة ع الفيس
بكلام قبيح وكلام تجريح
وكلام متغطي وفيه تلميح
وكل واحد يقراها
زي اللي اتعرت في الشارع

(٦)

ولا ورقة توت سترها
يا ميت خسارة على العائلات
لما جريوا في يوم ع الذات
وكله رافض يتنازل
ومدام العند فيهم نازل
العييلة حتفضل في النازل
طالما اللي بينهم بقى مسافات

وكل واحد له اتجاهات
ما تقولش ايه اللي جralها
مدام اللي كان بيلملم مات

العضمة كبرت

(١)

العضمة كبرت والشعر شاب
والصحة هربت ويا الشباب
وتفيد بايه كتر الدموع
ما هو الي راح مالوش رجوع
أيام بتجري عمالة تمر
الشهر فيها يدوب أسبوع
ومافيش أمل ولا حاجة تسر
ومستكثرين علينا الدموع
وبعد ما دُقنا سنين المر
وجه اليوم ندوق الحلو
قالو ممنوع ما أنت خلاص
بققيت مـوجـوع
شيخوخة حلت والبركة قلت

والنفس ملت ما بقاش في جوع
 قاعد وباسمع كلام كثير
 وكل الي أقوله ماهوش مسموع
 القصة مش قصة سنين
 القصة عالماضي والحنين
 وعلى الي راح - حتى لو مليون جراح
 في ماضي حلو وفيه حزين
 بس برضه له حنين
 ولو في اسم وله رنين
 بيدوب على مر السنين
 وهي دي سنة حياة فيها الي راح وفي جنين
 وأنا راضي برضه باللي جي
 وده قدرنا وهنولاه
 دلوقتي عقلي الي يقوله
 جسمي عجز يعمل هولاه

(۶)

في فرق بينهم وبقى مسافات
كأن الي بينهم شخص ومات
وبقى كل واحد على حاله
العقل لسنة في شبابه
والجسم بقى يرثي حاله
وهي دي سنن الحياة
زمان
زمان كنت أنا في بيتي أساس
دلوقتي تحفة مع الأثاث
حتى اتحررنا من السؤال
قاعد لوحدي في التراس
ما فيش دا جه ولا مجاش
بقيت فازه قديمة وتراث
ما بقالى كتير عالمعاش

لا حد بيسأل ولا في ناس
 كله راح زمن كداب
 كل صحابي ملح وداب
 قالوا اخترقوا ساعتها سحاب
 راحوا خلاص عند التواب
 يا بخت اللي راح بعد ما تاب
 وبقيت وحيد من غير أصحاب
 على فرع ماييل زي غراب
 ساكن زمن حاسه خراب
 دنيا بايخة
 ورق بيقع من شجرة شايخة
 أيام بتترنج ودايخة
 حتى أفكاري دلوقتي بايخة
 لما بافكر بلاقي نفسي
 بقيت رواية من غير كتاب

(٣)

مكتوب بقلم من غير مداد
بقيت قصيدة مملة وقديمة عند الشباب
تاريخي عندي تاريخ مشرف
لما بأقوله يقولوا خرف
دا لسة عايش زمنه القديم
لو بيت في عُمره أصبح رديم
وهو عايش زمن الجواري
وزمن الحريم
بقيت طريح فوق الفراش
باخذ أوامر مفيش نقاش
أوامر طبيب ما أنت عليل
برشام نهار دوا بالليل - طعمه مرار
تحاليل كتير وكذا منظار
أكل بحكمة وشوربة خضار

ما بقيتش عارف ليل من نهار
 حَقْنَة في وريد
 زغروطة جاية من عند جار
 بشري بوليد مولود جديد
 وأنا باسايح زي الجليد
 وكله أوامر ومليش قرار
 حَتَّى المدام
 أنا داخلَة أنام
 بلاش تَنَادِي
 عَنَدَكَ زَبَادِي
 اسْمَع كلام
 دا كلام طَبِيب
 وانت عَالِيَل
 حَتَّى القرار ما بقاش قرارِي
 واللي في حلقي علقم مراري

(٤)

وديني صابر على الممرار
ماليش قرار حتى في علاجي
لا عارف أتعامل ولا حتى راضي
أنا نفسي أروح عند صحابي
أنا عايز أمشي دا مش زمني
مليت م الفكر في الماضي
الخيطة خلاص أنا شوفت آخره
قولوا لصحابي حاولوا تتأخرو
ما العظمة كبرت والشعر شاب
والصحة هربت ويا الشباب
وتفيد بآيه كتر الدموع
ما هو اللي راح مالوش رجوع

صحوة ضمير

(١)

جاني هاتف م الضمير *** قالي قوم اضرب نفير
صحي ضمير كل واحد *** مافيش صغير أو كبير
مصر بلدنا محتاجنا كلنا *** وعلي صوت الحنجرة
دا حب مصر في دمننا *** بلاد كتير بتحبنا
وبلاذ كمان متضررة عايزاك *** تحت الثرى في المقبرة
عايزة تزيلك م الوجود *** بلد ضعيف مالوش حدود
عايزين شباب متخدره
ما تقلقوش ما يعرفوش فينا نفوس متحررة
دماء شهيد على أرض طاهرة مطهرة
تطرح رجال تطرح شباب مزهرة
جيشنا سابقنا للأمام *** وكمان حاميننا من ورا
ايدي في ايديك عا الدوام *** اصحى بسرعة وفوق قوام

اطلع صحاري انصب خيام
ازرع أمل بالعمل مش بالكلام
شغل مصانع *** صدر بضائع
شغل شباب كان وقته ضائع
معدن شبابنا دا جوهرة
اصحو بلاش الثرثرة *** وبلاش كلام المصطبة
وبلاش كلام المندرة *** دا احنا بلاد متحضرة
صحي السلاح قيد الشموع خلي بلادنا منورة
مش حايطولوها نكون ورا
شدوا الهمم احنا تاريخ قبل الأمم
عايزين نشاط زي الحمم
عايزينها قامة من القمم
شوفنا بلاد متقزمة *** شايفاك كبير متأزمة
قامت عليك متحزمة *** جابولنا ناس رسموا الورع
شوفنا معاهم البدع *** كانوا على توبنا رقع

كان نفسهم بلذك تقع
وفشلوا في إدارة البلد

(٢)

ما صدقوش جالهم صرع
ما هما ناس ضد الوطن *** وصفوا ترابنا بالعطن
وجيشنا باصص من بعيد *** لكن فطن
ولما حس بالخطر *** ساعد على نزول البشر
أصغر ما فيهم كان بطل
فيهم بطل وكان جـدع
حط صباعه عالوتر
وكشف لنا بتوع الورع
ضرب نفير كله جمع *** ممثلين للمجتمع
وقال حان بني بدون دلع
قلنا خلاص طاعة وسمع

_____ ديوان .. صحوة ضمير _____

من هنا حصل التغيير
بعد ما ضرب النفير
وبكدا صـحي الضمير

عنتره

(١)

عنتره جوة الميـدان
جي يفتح الهويس
طالب طلب ماهوش عويس
في حماية كاملة م البوليس
حرية كاملة والأمان
وعدالة موزونة بميزان
وعيشة آدمية نعيش
وعيش كويس م الرخيص
طلب صغير م الرئيس
اقف معانا في الميـدان
وقول معانا بأعلى صوت
يلعن سفيل الأمريكان
قدمهم نحس ع البلاد

مالهومش يوم أبداً أمان
فكرهم كاسرين عنيـنا
بسلاح وقمح فيه ديدان
نفسهم تقسيم بلدنا
بدل بلد تكون بلاد
وفوضى شاملة للعباد
عشان يأمنوا اليهود
لاحسن على القدس نعود
م الأمريكان أصلاً يهود
عشان كدة تفضل جعان
اصحي يا بت - اصحي يا واد
واعرف غرضهم م البلاد
وخلي ايديك ع الزناد
للي يخرب في البلاد
دا احنا عنتر مش وداد

(٢)

قولوا معايا في الميدان
يلعن سفيل الأمريكان

عنطرة في القنطرة
طول عمره راجل ما جاب ورا
لا عنده كلام ولا ثرثرة
ولا حتى غاوي المنظرة
على طول أسلحته معمرة
للصهيوني ابن المرة
عنطرة على الحدود
معاه رجال زي الأسود
لو شافوا يوم نجمة داود
محطوطة على علم اليهود
الخاصة بولاد القردود

حيحرقوها بالبارود
لو رجل واحد م اليهود
عدت وجت عند الحدود
حيربطوهم في العامود
عامود علم بلد الأسود

عنصرة في كل واحد مننا
بس احنا نحمي أرضنا
انشا الله نحمي بدمنا
ما هي بلدنا كلنا
حب بلدنا في الوريد
لو مات واحد مننا
في المعركة أصبح شهيد
وراح لجننة ربنا
يكبر ويحمي أرضنا

مرااتي وأمي / وأمي وحماتي

(١)

تلاتة مش راكبين على بعض
وكل شوية بياكلو في بعض
مرااتي وأمي / وأمي وحماتي
زعيق الصبح ونكد ليلااتي
وأنا مفروم بينهم يوماتي
يا ناس خلاص مش طايق حياتي
وكل شوية أقول معلش
يمكن كلمة ومش قصداها
وأمي تقولي بطل غش
ما أنت اللي همك بس رضاها
اسكت أنت ما تتكلمش
ما هو لو كنت دبحت القطعة
ما كنتش تبقى معاها برطة

ولما تقوم الدنيا حريقة
اعمل نفسي جاني زغطة
عشان كله يتلهي فيا
وأفضل أكح ويغمى عليا
عشان تهدى الدنيا شوية
أمي لسة عايشة قاديمو
عايشة سي السيد وحريمو
لو قولتلها دا جيل غير جيل
تقولي اخرس ياد يا عويل
دا رغم أبوك ورانا المر
كانت البسمة في وشه تسر
ولو في الحارة كان بيمر
وشاف الواحدة في البلكونة
ببصة واحدة كنا نهر

(٢)

ما هو أنتو جيل رجالة وخلص
 أبوك كان راجل مش قرطاس
 راجل بجد / ماهوش مهياص
 ولما مراتي تقولي يا بابا
 أمي تقولها جتك ابو
 يا شايدة يا بايدة يا شكل العو
 يعني أنا تيدة يا بت يا سو
 أمي يا ناس ليها كذا مكيال
 حسب القلب ما كان ميال
 لو جوز أختي هداها عربية
 ما شاء الله لايقة عليها
 ولو جبت أنا لمراتي جلابية
 مضيع حاله وماله عليها
 أمي مع أختي تقول يا هناها

أما مراتي على طول خرباها
نفس الحال وراح متغير في المكيال
أما مراتي
أما مراتي يا عيني عليها
نقش الحنة ما ساب رجليها
بتغيظ في أمي ورسمه عندها
كمان في الشغل / حطى عليها
وكل يوم تتبلى على أمي
أمك كل شوية ترمي
لما بحط ليك مكياج
اغسلي وشك دا أنتي تغمي
قالت كلمة وفار فيها دمي
على الله يتمر فيكي اتسمي
ولو اتكلمت / تقولي اتلمي
يا أخرت صابره / ايه كان جابره

(٣)

بس دي حكمة ربي وأمره
 أما حماتي
 أما حماتي حمات السو
 تيجي شوية حريقة تقوم
 وأقوم مفزوع من عز النوم
 وأفضل أطف تاني في الجو
 كمان حماتي قالبة مراتي
 في التليفون على أمي ليلاتي
 شغالة شغل الله ينور
 بتحفظ فيها وتعيد وتكرر
 اشتغلي معاهم شغل نماردة
 وحاولي تكوني معاهم باردة
 ها أدكي وصفة ما تخيبش
 الست الشاطرة ما تتكلمش

واقرصي قارصة ما تعلمش
يعني غظيها بالعين والرمش
لحد ما حماتك تتهور
يا تشتمك يا تقوم ضرباكي
وابكي واقولي كلام متحور
ساعتها الحق حايبقى معاكي
وامسكي ودنه / وخليكي رزلة
ساعتها حايدور على عزلة
خلاص يا ناس مش طايق حياتي
وبقيت مفروم بينهم يوماتي
مراتي وأمي / وأمي وحماتي

عظمة الجنية

(١)

أنا محمود أبو هليل
في مرة تعبان ومقيل
ونمت وقال ايه
حسيت ان أنا باتخيل
ان أنا بانده لجنية
وبقوله تسمح يا جنية
تسمحلي أسرح بخيالي
ان انت بقيت في العالي
واتباهى انك راس مالي
قاللي بشرط يا بو هليل
تتخيل فترة ما تقيل
لو تصحى ما تسألنيش
وتعيط زي العليل

وتقول زودني شوية
دا أنا عندي اكر من عيل
وأنا نفسي برضه أعيش
وتحلم بسوق العيش
قولتله عيب يا جنية
دا أنا نفسي بس أتخيل
قال ماشي يا أبو هليل
اتفضل يلا يا بيه
يا سلام عليك يا جنية
يا حنين يا بن الايه
يا مجرى الكل وراك
من البواب للبيه
يدوبك نص الكف
بيك العالم يتلف
يا صغير يابن الايه

(٢)

يا سلام عليك يا جنية
يا سبب سعادة الكل
واليورو جايبله السل
والدولار خازق عنيه
والين يا حسرة عليه
مش برضه تحن عليه
يا صغير يابن الايه
يا مساعد كل الأسرة
وبتيجي بنعمل نشرة
ونذيعها في القنوات
لما الديانة بتعرف
على طول بتقولنا هات
ببقيته نعيش باشوات
يا صغير يا بن الايه

يا دافعلي اقساط عربية
ودافعلي فلوس جمعية
ومجهز كل صبية
وكل دا بجنية
يا ملبس كل عروسة
ومفرح المتعوسة
والنبي تستاهل بوسة
أول ما بتيجي يا جنية
يا صغير يا بن الاية
يا مظهر المواضيع
ومشبع المعاميع
ومنضف الجرابيع
كله صغار وكبار
بالذات الي اسمه دولار
يا صغير يابن الاية

(٣)

جبتلي شقة تمايك
 بالباقي بدله شيك
 ربنا يبارك فيك
 ويخزق عين اعاديك
 الي عملي نلي كبار
 الـيـورو والـدولار
 يا صغير يابن الـايـه
 يا سلام عليه دا جنيـه
 بنضرب سلام لعظمتـه
 لما بيـجينا في وقتـه
 مقطوع بنقولـه سلامتـه
 محسود يا بن الـايـه
 يا سلام عليه دا جنيـه
 ورغم قيمتك يا عظمتك

كتير أهانوا معاليك
طالع من البنك مهندم
ولابس ورقة شريك
وشوية وبهدلوا فيك
قلوب مرسومة عليك
سماك بيظفر فيك
بصمة ميكانيكي عليك
في سنان شغال تسليك
في ودانهم بينخربوا بيك
ومفيش حد يحميك
مستحمل يابن الايه
العمالة خدت قرار
حيصغروك يا جنييه
في الحجم تبقى زرار
او قد غطا الكازوزة

(٤)

ساعتهـا مالـكـش عـوزة
 بـقـيـت يـابـن المـحـظـوظة
 فـي القـيـمـة بـألف دـولـار
 وهـمـا بـرـبـع جـنـيـه
 يا صـايـع يـابـن الـايـه
 أـمـا انـت خـبـيـث يا جـنـيـه
 وشـوـيـة وـجـت أم هـلـيـل
 ولـقـيـتـها عـا الغـطـا بـتمـيـل
 كـان وـاقـع وـأنا مـقـيـل
 وقـالـتـلي ايـه مـعـريـك
 مـش عـارـف تـسـتـر نـفـسـك
 كـل شـوـيـة ح أـغـطـيـك
 يا وـليـه سـيـبـيـني أـتـخـيـل
 هـات المـصـرـوف يا مـنـيـل

لو عايضة صحيح مصروف
تعالني أنا وانتني نقييل
ها أدكي دولارات ملايين
وأنا وانتني مقييلين

ناموسة شقية

(١)

ناموسة وقفت على راسي
شعري زمان كان حامي راسي
ما هو شعري كان من حراسي
دلوقتي ببذل في شماسي
راحت تمشي على القارعة
وقالت ما فيش بعدها مرعى
وقالت دا رزق كبير طاغي
وراحت تنقر في دماغي
قمت ضاربها بمداسي
هربت وورمت فيها راسي
قالتلي كدة جبتلي خارعة
انسيتك تاني يا بن القارعة
دا أنا في الزوغان شاطرة وضالعة

أنا كدة حاطيتك في دماغي
وشغلي معاك شغل مصارعة
حاتشوف الشغل على أصوله
لحد ما تعيط لأماك
مدام مافيش حد يلمك
في الضلمة برضه راح أشمك
وكل يوم حا أشرب دمك
من النهاردة مافيش راحة
أنا قعدالك وحاسمك
فاهم يا واد يابن الجارية
دأنا يا واد كاتبة وقارية
امتى حاتحس على دمك
دي سبوبة يا واد جارية
وأنا ليا رزق أشرب دمك
مصارينك ليه عندك هارية

(٢)

دا أنا يا واد بت بعوضة
 ولا ثانية ليك سايبة الأوضة
 دا أنا أستأذة ومصاصة
 مش تلميذة وفي الروضة
 أنا في الكار ده بقالي زمان
 يعني تقول كدة ست أيام
 عُمر كبير وعُمر مديد
 بلاش معايا شغل التهديد
 يلا يا شاطر بره بعيد
 بتهددني برش مبيد
 دا يوم السعد ويوم العيد
 دا بالنسبالي نقص حديد
 بقويني ورشه مفيد
 ويوم سعادتنا لما بيظهر رش جديد

رايح تجيب حنة صاعق
ما هو يا أنت عبيط يا أنت مراهق
دا احنا بنلعب جوة سلوكة
ولما بنزهق ندهنوا دوكو
لو انت خايف على راسك
البس زعبوط زي شكوكو
ان ما دوبت مداسك
والله ما أنا سايب راسك
ما هو المزداد رسي على راسك
فكرك هاتهرب وتروح فين
راسي فيها أكثر من عين
لو حتسافر راح أجيلك
لوحتي في شنطة سراويك
من فوق القارعة وحا أديلك
جايني ولابس حنة شال

(٣)

ان كان عالشال وحياة أمك راح ينزال
 أو تتوضى ساعتها الشال راح ينشال
 وحنسلى عليك يا غزال
 بتهرب مني وتلبس كاب
 حنعمل خرم ونفتح باب
 مش حاتحس اننا بنمص
 ساعتها يا روي لينا ميت ناب
 ما تعيطش وتجييب ناس
 ما أنت البادي بضرب مداس
 ولا كل ناموسة ممكن تنداس
 مخلص الفاس وقعت في الراس
 ومش حاتنام خليك محتاس
 في مرة بادندن مع نفسي
 وفي ايدي سيجارة ما هيش والعة

بطلت ما هي قطعت نفسي
وبغني يا طويلة يا فرعة
بمايوهك على شط الترعة
ترتاحي وتنقري في القارعة
وحاطة رجل كدة على رجل
وأنا واخدة بريك عند المصرف
كنت أنت وعيل زي العجل
ورحت هناك قولت أما أعرف
وكانت ريحتكم كدة تقرف
سمعت بينكو كلام وحوار
ان انتوا ختو ضدي قرار
وتقوم تصطادني كدة بشويش
صدقني لو أنت وأهلك جيش
أنا عندي جهاز اسمه استشعار
لو حسيت بأيديك تتمد

(٤)

ساعتها حا اكون بلغت فرار
 فاهم يا طور أنت يا صرصار
 وليك وردية عندي هدية
 حا أشتغل عليك في عز نهار
 أما انك شخص غتيت
 دا احنا أرحم من البراغيت
 فين أيام شغل البراغيت
 وانت بتجري تقول يا مغيت
 دي البراغيت هرياني مش ناسي
 جاي دلوقتي تقول آه يا راسي
 فين براغيتك جوه الدكة
 جاي زعلان من حنة شاكة
 يابن الجارية يا حنة ساكة
 هو انت فاكر نفسك مين

دا أنت راجل متسول
وحياة أمك لا تغول
أنا شاكّة فيك م الأول
تلاقيك انثى ومتحول
وحا أنقر راسك واتجول
وحاتضرب حا أرجع واتبول
وها أعيد القرص من الأول
انشا الله قضيه وتدول
لغاية ما تفقد احساسك
وتغطي راسك بمداسك
فاهم يا واد يابن الجارية

الحلة فوق النار

(١)

الحلة فوق النار *** وأنا راجع من مشوار
وماكنتش دوقت فطار *** ومراتي ماسكة التليفون
في ايديها ليل ونهار *** ماسكين في سيرة الناس
وكلام يجر كلام *** وحوار يجر حوار
وسبيكر مراتي مفتوح *** وصوتهم كان مسموع
وأنا حاموت من الجوع *** والحلة فوق النار
وبدأت مراتي أنني هار
صباح الخير يا منار
قوليلي مفيش أخبار
بيقولوا عذيلة اتخطبت
بجد ولا هزار
بجد ياخوتي بجد
ودي خادها أنهى حمار

بيقولوا عليه مبسوط
وعنده أراضى كتيير
وعنده كمان دوار
لزموه بالعفش كله
والأوضة كمان باليكار
والحالة فوق النار
عارفة تهاني الهابلة
بيقولوا عليها عفريت
وعنياه بتطالع نار
وخروجة ال أيه مش ماشي
إلا بدقة وزار
ولا وجيدة بنت أبو عبده مشيت في نص الليل
وخذت عيالها وهربت
الكل صغار وكبار
بيقولوا قال أيه يا ختي
جوزها هربان من تار

(٢)

والحالة فوق النار
ولا البت بنت شفيقة
اللي ساكنين عالسطح
اللي شغالة في مستشفى
وبتيجي وش الصبح
طلعت قال ايه يا ختي
شغالة في صالة وبار

ولا البت بنت حماتو
قال ايه غلطت مع جارها
دي بت تجيب العار
لو يلهف جرار
وأم أحمد يا ختي جارتنا
قال ايه بيقولو دي شايلة
معقول صحيح يا منار

في واد ولا بنوتة
بقولوا حتجيب بنوتة
ما هية عاملة سنانار
والحالة فوق النانار

الواد يا مدام بيعيط
يمكن الواد مبلول
محتاج حد يغيرله
والنبي قوم هاتله غيار
حتى الواد اللي بيرضع
ما أنتش عمالة بزازة
ما انتي دماغك مشغولة
أول ما الواد يجوع
بتسكتيه بممبار
والحالة فوق النانار

وفجأة الصوت بقى واطي
أكيد بيقولوا أسرار

(٣)

والضحكة عليت أوي
وصاحببتها تقول معار
ومراتي تقوم بصالي وتقول كله مكار
والحالة فوق النار

طابخلهم ايه يا منار
يا سستي طالبة دليفري
يا عيني علينا ياختي
ما حد حاسس بينا
الشقا بقى ليل ونهار

القميميص مقطوع يا ولية
محتاج للقميميص دا زرار
ودماغى كمان حتفرقع
برششام الضغط فين
تلاقى فيه في تانى جرار
وشوية راحت بصالى
لقيت في عنيا شرار
عايزة حاجة يا منار
لما ألحق أصلى العصر
ربنا يستر ولايانا
وأشوف بالمرة الأكل دا الحلة فوق النار

خلصتى كلام وحوار
الأكل فين يا مدام
خلص يا حبيبى خلصت
البيت ما بقاش فيه راحة

بعدين هية اللي اتصلت
طب ياله هاتي الأكل
منك لله يا منار
نسيت أقيد النار

(٤)

تتغدى ايه يا حبيبي *** تتغدى معايا فشار
فاكرة يا حبيبتي عديلة *** اللي اتخطبت لحمار
أنا برضه طلعت حمار *** مش كدة برضه يا أنهار

ليلة دخلتي

(١)

دقو يالا بالدفوف
الليلة ليلة فرحتي
زغروطة حلوة يا بنات
غنولي يلاغنوتي
وروني يالا يا بنات
ردولي يلا محبتي
حميني يالا يا عمتي
دي الليلة ليلة حنتي
وبكرة حاتبقي دوخلتي
زغروطة حلوة يا بنات
يارب تدوقوا فرحتي
ما طيلا بينا يا بنات

ظبططولي طرحتي
ما هو خلاص يا بنات
أنا مش محتاجة مخدتي
ما هو جه يا بنات
الي حيكسر وحدتي
زغروطة حلوة يا بنات
يارب تدوقوا فرحتي

قولوا لأبويا يا بنات
أنا عايضة زينة في شرفتي
لاموت نفسي من العياط
واروح اشتكي لجدتي
واقطع لسان كل النسوان
الي ساكنين في حتتي

وارتاح من أمي يا بنات وتسميها في جدتي
كل البنات اتجوزت
وانتي الي قاعدة في خلقتي

(٢)

يلا روحوا يا بنات
فرجوههم شبكتي
وغيظوا فيهم يا بنات
الي قطعو في فروتي
بالذات سعاد بنت الجيران
الي عمالي صاحبتني
زغروطة حلوة يا بنات
الليلة ليلة فرحتي

اقراصوني يا بنات
 بس تحت ركبتي
 ليسان القرص يا بنات
 وأنا قالعة في غرفتي
 ان شاء الله قريب يا بنات
 تحصلوني في جمعتي
 وابقوا عاتبوا يا بنات الي حاتبقى سلفتي
 قولوها عيب يا بنات
 لما تخبي جزمتي
 وحطت ليا يا بنات
 شطة حامية في شنطتي
 قولوها عيب يا بنات
 ما هش هتبقى ضرتي
 زغروطة حلوة يا بنات

الليلة ليلة حنتي
حذروا قرايبي يا بنات
الي حيرصوا في شقتي
لا تيجي واحدة يا بنات
تقعد على كرسي سفرتي
زغروطة حلوة يا بنات
الليلة لية فرحتي

(٣)

فين شطارتكم يا بنات
خلوا ايديا منقوشة
أنا بكرة الصبح يا بنات
ها اجري بسرعة عالكوشة
بعد ما أتمكيج يا بنات
مش حاتشوفه زي عروسة

أنا عارفة عريسي يا بنات
حيط في بقي بسبوسة
عشان يشغلني يا بنات
ويقوم خاطف مني بوسة
وأنا ساعتها يا بنات
حا أعمل روعي مكسوفة
وافرس ساعتها يا بنات
البت بنت المفروسة
البت سعاد بنت الجيران
الي عمالي صاحباتي
زغروطة حلوة يا بنات
الليلة ليلة فرحتي
دقوا الدفوف يا بنات
الليلة ليلة دوخلتي

حببتي الي غدرت بيا

(١)

حببتي أول ما اتعلقت بيها
قالوا وحشة مش مقامك
انت بس الفكر خانك
ومن كسوفك بتداريها
قولت حلوة ولا وحشة دي حببتي
وفي عروقي سارحة فيها

ما تسألش يا حببتي فيهم
دا الحق ديا حببتي مليم
أكيد دول غيرانين منا
وبيحاولوا يوقعوا بيننا
دا ياما قالوا عليك كلام
وحاولوا يفرقوا بيننا

ما يعرفوش ان بينا غرام
 ومفيش تالت يزاملنا
 وياما لطحوا هـدومك
 بصور يمكن تحول بينا
 ومهما لطحوا صورك
 عطرك دايمًا بيغاذلنا
 ما هو عطرك بينعشني وبقى في دمي
 نموت لو يوم يغادرنا
 ما هو انتي يا حبيبتي حياتي
 وبقيتي جوايا في ذاتي
 مش متصور يجي اليوم ازاي وانساكي
 دا انتي في ذاتي وملذاتي وسري معاكي وأنا بأهواكي
 وأنا ما أعرفش انتي لولاكي ايه كان جالي
 دا أنا ياما سهرت معاكي ليالي
 وياما شككك عن أحوالي

(٢)

وكنتي تواسي وتبوسي راسي
وعمر ما قلتي طب وأنا مالي
علشان كدة ما أقدرش أنساكي
وفضلت أنا وهما في حوار
ووصل الحوار بينا لشجار
وانتهى بينا الرهان
وبدأوا يقولوا وباصرار
ان الحاجات دي ليها أضرار
في حد حبيبته تبقى سجارة أو سيجار
أو شيشة حمي بالفواكه
كل اللي ناقص تمباك خضار
طب اسمع صدرك وانت نايم
صدر واحد كان بيموت
و دلوقتي صدرك له صدى صوت

والصوت عالي ومالوهش ريموت
ونفس طالع زي المزمار
وكان دي حفلة دقة زار
والحفلة ناقصها أنون وجيتار
حبيبتيك ديا غدارة
مش بس كدة وكمات ضارة
قولت برضه بس سارة
قالوا بكرة تقول يا صديري
وليه يا دنيا أنا شبت بدري
غير فلوسك راحت خسارة
وانت جاي تقول دي سارة
بكرة تندم ع السيجارة

(٣)

بعد ما تدوق المرارة
ومرت الأيام والصحة في النازل
وبقى بيني وبين الأكل عازل
وعام ورا عام
بقيت جهاز خربان
وخسرت أنا الرهان
وبدأت أحس بالألم
والصحة مايلة للعدم
بعد ما غدرت بيا في لحظة
وما أدتنيش ولا حتى ملاحظة
ألم في صدري وعيون جاحظة
والشهية بقت ملغية
ونسيت كلمة جوع

والنفس بقى مقطوع
والضهر صبح مخلوع
والكحة بالأسبوع
وبدأت أنهج كأن دا منهج
باسمعه يومي على السلالم
وقولت يارب أنت يا عالم
تزيح عني كل الألم
وانسى حبيبتي وتنساني
بس الصحة تعود تاني
وماخذتش بالي من العرض
لحد ما أشتد المرض
ودخلت غرفة الانعاش
والغرفة ماهش ببلاش
ودخلت في الغيبوبة

(٤)

والأنف فيه أنبوبة
والرئة بقت معطوبة
ولا داري مين جه ولا جاش
والحياة من غير الصحة ما تسواش
والبلغم اتعلم سيكا
ونهاوند في صدري ومزيكا
والمايك في ايدين الكحة
والحفلة في صدري أنتيكا
وقول على أد ما تقول

جهاز تنفس شغال على طول
ومضاد حيوي على محلول
وعلاج يوماتي واستويت
ورفعت ايديا بالشفا ودعيت

وخذ ربنا بأيدي
 كام شهر وبعديها خفيت
 كأنني اتولدت من جديد
 وانسحب حبيبي م الوريد
 وسمحولي بالخروج ع البيت
 وقالولي الخروج دا بشرط
 اوعى تنسى في يوم ليه جيت
 قولتلهم دا أنا أتربيت
 وحلفت خلاص ونويت
 م أنا راجع لشربها ثاني
 مش ناقص اكح وأعاني
 خلاص صدري في النوم ارتاح
 لا مزيكا ولا حتى أغاني
 شوفتها مرصوصة على الرف
 عروسة ونفسها تتزف

(٥)

وعريسيها مروح ماهو خف
والكشك كان تحت البيت
غمزتلي على طول حنيت
وساحبتني كأني اتغميت
على الكشك بسرعة ولفيت
وسألته ونسيت الشرط
يا معلم بتبيع بالعلبة
مش ممكن تديني بالفرط

تيتة

(١)

ابقى يا جدو كلم تيتة
تيتة خلاص حطاني في دماغها
وجاية تقول اني مدوخها
وبتتبلى عليا سي تيتة
وانت عارفني ماليش في الزيتة
في مرة جبت الكورة بتاعتي
وقولت أنطط كذا تنطيطة
عليت مني الكورة شوية
راحت كاسرة ساعة الحيطه
قامت تيتة راحت ضرباني
وحطت وشي في وش الحيطه
هي كدة على طول ظلماني
تيتة حطاني جوة دماغها

وتلبسني اللي تدغدغها
وفي مرة دخلت الأوضة بتاعتك
وكنت واقف جنب التسريحة
غصب عني وقعت مني إزازة الريحة
عملت تيتة عليها فضيحة
وبرة الأوضة قامت ضرباني
هي كدة على طول ظلماني
وقالت ليا كلمة قبيحة
وحياة أمك يابن القريحة
لاكسر عضمك يا تلقيحة
ابقى يا جدو كلم تيتة

احكم بينا يلا يا جدو
في مرة أنا قمت بعمل بطولي
وكننت لوحدي وكننت بطولي
مرة بشط عود كبريت
غصب عني قامت الولعة في وسط البيت

(٢)

لقيتها يا جدو بترقع صوت
خوفت منها قومت جريت
هي يا جدو غاوية تزيط
ورجعت تاني اطفئ النار
بدل ما تقولي برافو عليك
جاية تقولي يا وش خراب
ما أنت عليك خراب الدار
هي كدة دايمًا ظلماني

وكل شوية تقوم ضرباني
وفي مرة قالتلي ان أنا خباص
وانت عارفني بير أسرار
والخباص بيروح النار
ما أنا اتعودت الظلم خلاص
طب انت لاحظت ان أنا خباص
جتلك مرة وقولت عليها
وانت برة بتسيب بيتها
وكل شوية عند جارتها
وكل واحدة بيحبو سيرتها
وياما حريم قطعوا فروتها
ما كل دا أنا شايله في قلبي
عمري قولت يا جد ودا ليك
ما أنت عارفني بير أسرار
قول الحق يالا يا جدو

بالنسبة لتيتة أنا جبت سيرتها
شوفت يا جدوا ازاى ظلماني
وكل شوية تقوم ضرباني

ماشي يا تيتة برضه أنا عرة
حا أكلم بابا في بلاد برة
يفهم جدو يجيبلك ضرة
تلهي تيتة مع ضررتها

(٣)

واخد راحتى جوة في بيتها
وارتاح منها كدة بالمرة
يا ريت يا جدو تغير تيتة
خد يا جدو فيها قرار
بس قرار محتاجله عزيمة
تيتة يا جدو دقة قديمة

وهاتلك واحدة لسة سليمة
وتكون واحدة عليها القيمة
واحدة زي بتوع السيمما
وبطل تاخذ واحدة سميينة

وكممان يا جدو تيتة بخيلة
القرش بيطلع معاها بالتيلة
دي مكسرة دايمًا مقاديفي
في مرة جاتلي فكرة جميلة
بدل ما تقولي برافو عليك
راحت قيلالي اطلع برة يلا يا نيلة
بص يا جدو على رجليا
في مرة قعدت تيتة عليا
انكسرت فيها قوام رجليا
طب حتى يا جدو بدلهها

دا مفيش حاجة راح تعدلها
يلا يا جدو بدل تيتة
بدلها انشاء الله ببرنيطة
نفسى أقول كلمة وصدق
المرة الجاية ابقى دقق
هاتلك مدام بق محندق
وبلاش والنبي تاني تحق
ما انتي الي عملتي كدة يا تيتة

یا دنیا لیہ معندانی

()

يا دنيا ليه معنداني
بـحـبـك
ليه انتي كرهاني
بسايس فيكي طول عمري
وصابر معاكي وطال صبري
وساعة الفرح نسياني
وعند الحزن دعياني
يا دنيا ليه معنداني

* * * * *

د أنا اللي زارع أراضيكي
وبعشق كل شيء فيكي
وليلي نهاري براضيكي

وبميمة الورد بارويكي
 وتبقى حنة من الجنة
 ولينا تطرحي الحنة
 تحني بيها عرسانك
 وبدل ما تحني في يوم رجلي
 عرق رجلي يحنيكي
 وبرضه مش طامر فيكي
 يا دنيا ليه معنداني
 بحبك - ليه انتي كرهاني
 دي ضربة فاسي في أرضك بحنية
 وبكف ايديا باساويكي
 عشان ترضي
 ويجي اليوم تغذياني
 ألاقني فاساك

في راسي بيدبحني ويدميني
عشان أرضيكي يا دنيا
وعين العطف تشملني

(٢)

زرعت فيكي الحنان على طول
عشان يبقى الوداد موصول
وزعتي الحنان ع الكل
وجه عندي صبح مشلول
ليه يا دنيا تعبانني
وليه سيفك علينا مسلول
يا دنيا ليه معنداني
بحبك ليه انتي كرهاني

كان نفسي الحظ يتبسم
والعدل فيكي يتقسم
رمى الشبكة في بحورك
يمكن تجيبي بلطية
ويكون النهاردة يوم حظي
وتكون السعادة معدية
طلعت الشبكة مليانة
وفيها جثة مقتولة ومرمية
لظمت بأيدي على خدي
وبقت المصيبة من حدي
وبسرعة بكيت على حالي
وقلت للحظ آه ياني
ليه أنتي كرهاني

حتى البنت اللي حبتها
وحطيت في ايديها دبلتها
وقلت على قدها وقدي
وأكيد الحظ راح يدي
والفقر حيمشي ويعدي
جه غني شاور بأمواله
في لحظة أهلها مالو

(٣)

وأبوها انقلب حاله
أثر عليها بأحوالي
وقال فقير على قده
ما ينفعش يكون للغني نده
دا الفقر رابطة وبشده
والجوع بالعافية بيسده

وف لحظة لقيتها سيباني
وقالتلي فقر من تاني
دا السعد جاني وناداني
يا ريت تبعد وتنساني
وقامت قلعت الدبلة
وبعزم ما فيها رمياني
ورجع الحظ عاداني
حطيت ايدي على خدي
وبسرعة بكيت على حالي
وقلت للـحظ آه ياني
يا دنيا ليه معنداني
كرهتك ما دمتي كرهاني

موال الفول

الفول عمدة بلد *** في بطن الفقير لو جاع
والعدس شيخ البلد *** لو كانت المعدة تساع
والمش لجوع الفقير *** دوا لو حتى ياخذه أقماع
واخص عليك يا زمن لما تخلي قوالب الرجال أرباع
وتخلي أنصاف الرجال أسباع
وياهنا الراجل اللي ربا وولاده بقوله دراع
ويا عيني على بنت الأصول بعد الخدم والحشم
تنزل تببيع نعنناع
والحرة اللي حافظت على شرفها وقصت شعرها وانباع
ويا خسارة الشاب لو عمل شعره دفيرة وماع
والندل لما يسب الأصل ويسبب للأصيل أوجاع
ويا غدر الحبيب للحبيب لما يمشي من غير حتى وداع
وباشا لما تزول الرتب ويقولو عليه دا تباع

أوعى تدي أمان للزمن أحياناً يبقى الزمن خداع
ويخلي صاحب العمل في محله يوم بيع
والباطل حيفضل باطل ولو حللوه في مذياع

أصل الصورة

(١)

قلبي استقبل صورة
عنيا كانت لقطاها
الصورة لبنت جميلة
سبحان الله محلاها
والصورة بقت محفورة
في القلب وعاش جواها
وعاش القلب ليها
كأنه ما شفش سواها
وانشغل يوماتي بيها
وطول الليل يلاغيهها
وكان الروح جت فيها
وبعد فترة القلب فاق
قال حب صورة

زي داء مالوش دواء
 مافيهاش حبيبي في يوم زعل
 وبالوداد خلّيته راق
 ولا فيه محاولة بالرجوع بعد الفراق
 ممكن تكون متجملة
 صورة مدهونة بنواق
 أنا محتاج في الصورة دي روح
 صورة تكون من شحم ولحم
 عايز كلمة تغذي الروح
 فيها همسة ولمسة وغمزة
 فيها مين ح يسابق الثاني
 ويجري بسرعة قوام ويبوح
 وبدأ القلب يقولي
 وفضل القلب يلح
 ودموعه كانت بتسح

(٢)

واقول صدقني يا قلبي
دي واحدة وكانت عابرة
بطل يا قلبي مكابرة
والعين ياما بطوف
وياما عيوني بتشوف
يجي فوق المليون صورة
لو عيني كانت عارفة
انك ح تعيش جويها
كنت أعرف فين أراضيه
وعنيا كانت تلاغيها
وليه تتعلق بيها
م أنا ممكن أشوف زيها
واعرفلك فين أراضيه
بس انسى يا قلبي الأصل

هو أنت يا قلبي مريض
معتبر الأصل دا مصل
طب قولي أدور فين
ما أعرفش طريقها منين
ودي لقطة خدتها العين
ما كانتش الصورة مقصودة
عاشان تتعلق بيها
ورجع القلب يقول
يا عيني ليه بتهربي
عاشان خاطري دوري
وفي كل عابر صوري
يمكن الحظ يجي في يوم
وتشوفي حبيبي وتعتري
وقبل ما تيجي تدوري
اتكحلي واتعطري

(٣)

وبجوز عيونك ارسامي
واتبسامي واتنسامي
وحاولي معاه تتكلمي
واحكي لها عن عشقي لها
وعذاب فؤادي في حبها
وقولي لها ايه كان منظري
وأنا مع صورته لوحدنا
وكل يوم باتخيله
وفي ايدي صورته بكلمه
واسرحه واراحه
وفي حضني ليلاتي بنيمه
وصعب عليا القلب
ولقيت الشوق في عنيه
وعنيه ماليها الغلب

وخذت قرار بالبحث
عن أصل الصورة شهور
وأنا عارف قلبي دا نحس
متعلق بالمحظور
وعنيا ما بترتش
وبدأت تلقط في الضلمة
قبل ما تلقط في النور
لحد ما جالها دمور
لحد ما عدت مرة
لقيتها بدر بدور
راح قلبي معدي الصور
وكأنه كان في مجرة
وقالي الحقها بسرعة
بسرعة يلا شاغلها
سبل في عنيك وخايلها

(٤)

واعمل نفسك مسرور
لحد يجي يشغلها
وعنيها تلقط صورة
وتبقى في قلبها محفورة
وأنا وأنت نبقى في لحظة
خارج برة الصورة
نفس اللي قلبي كان بيعانيه
طلع قلبها حاسس بيه
ولقيته في أصل الصورة
وعنيها بتلف شهور
ولما قابلت الأصل
وعنيها جت في عيوني
حاسيت بعيونها لاموني
بتقولي عنيك ظلموني

ما شوفتش في عنيا الفرحة
لما عيونك بصولي
دا أنا أول مرة أنا شوفتك
وعنيك خبطو وزاروني
صورتك دخلت في القلب
والقلب عاش في الصورة
وبقالي شهوور وبدور
وقلبي بدأ يتهور
بقول محتاج للأصل
دلوقتي لقيتله الأصل
أنا مش محتاجة للصورة
أتاريننا في نفس الوقت
لقطنا لبعض الصورة
والي في قلبي بقى في قلبه
والصورة طبق الأصل

عيد الميلاد

(١)

شوفتها في عيد الميلاد
بتطفي سنة من عمرها
واتبسمت ليا بوداد
في لحظة بقيت مشدود لها
وشيء غريب صحن الفؤاد
مع أجمل بسمة شوفتها
وبعد قلبي ما كان جماد
جري في عروقه دمها
بعد شوية العقل ساد
وسألت قلبي وقتها
قولتله ليه العذاب
قال ما تلومنيش على حبها
ما أنت اللي جيت فتحت الباب

لما بشوق بصتلها
مش دي اللي كانت في الخيال
لما حلمنا بزيها
ولما نلاقيها في الحياة
تقولي نبعد عنها
قولتله خلاص نسيت اللي قبلها
والي ياما عانيته منها
قال بس دي مش زيها
ولا حتى فيها منها
حتى البراءة في وشها
وشوفت خفت دمها
وجمال النغزة في خدها
جرب معايا تحبها
وانسى اللي كانت قبلها
يا قلبي الحق عليا مش عليك

(٢)

عاشان نظرة عنيا أثرت عليك
يا ريت ضلوعي وقتها
غممت عنيك
أو عملت سائر وقتها
وقفلت عليك
صدقني مش حنعيده ثاني
سهر وبكا وأيام نعانني
كم جرح جانني
من حبيبي الأولاني
سنين يا قلبي النوم جفاني
وانت تبرر وتقول عشاني
وتسالمح وتغفر
وتقول ثوانني
اديله فرصة / محتاج لعطفك

واديله حبي ويزيد حناني
وبعد فترة ألاقية في لحظة
مع حد تاني
وجاي تقولي انسى اللي راح
سيبلي يا قلبي الدنيا براح
أنا مش عايز تاني جراح
بعد يا قلبي ما كنت ملاك
جاي تسحبني تاني وراك
جاي بتقولي حُبه في دمك
وتشيلني همه وهمك
وتعذبني تاني معاك
وارجع تاني أعاني وياك
هو أنت يا قلبي غاويلي الذل
مالكش يا قلبي عيون بتطل
وتشوف ازاي الشوق بيضر

(٣)

سهر وشجون وسنين ما تسر
لو فيه ذكرى وكانت حلوة
تنتهي مر
عايزني سجين وأنا عايش حر
يا قلبي معاك ما تعذبنيش
لو عايز تحب حب لوحداك
عشان في عذابك
ما تلومنيش
أنا كدة حر
عشان خاطري سيبني أعيش

مانيكان

(١)

يا محيرني كتر وقوفك
 ليه مراقبني ورا الشباك
 حبيتك من قبل ما أشوفك
 ومش حا أرتاح غير بعد لقاك
 ليه يا حبيبي مداري كسوفك
 افتح يلا بلاش خجلان
 واشرحلي يا حبيبي ظروفيك
 دا أنا عاشق والعشق جنان
 اسمحلي خليني أشوفك
 واتخلص مرة من خوفك
 اتجرأ يا حبيبي وبان
 احساسي بتبص عليا
 والوقفه سحبتي عليا

نفسى أعرف مين ورا دا هناك
بيراقيبني من ورا شباك
وشوية بقيت تشغل عقلي
راح عقلي مخط على قلبي
وعنيا جريت لهنالك
يا شاغلني من كتر وقوفك
ليه واقف ما بتكلمش
والضوء عندك مبيحدش
ونضارتي نضارة بكرش
وأنا من غيرها ما بكشفش
ليه واقف يا حبيبي على جنب
ولا حركة وكان دا ذنب
بالعافية بحدد رؤياك
وأنا قلبي بيقول صدقني
دي واقفة علشان حباك

ما تقولي يا حبيبي ظروفك
ما بدأت أعلق بوقوفك

(٢)

ونفسي في يوم تفتح أشوفك
انشأ الله توارب الشباك
حيرتيني يا روعي معاكي
نفسي قلبي ما يتحيرش
وليه المكان ده ما يتغيرش
ما هو ياخذ وادي وياكي
أو حا أدخل واقفل شباك
أو أعزل وامشي وانساكي
نفسي أعرف الوقفة دي ليا
ولا انتي ما أنتيش طبيعية
طب حاولي يا حبيبتي تباني
انشأ الله يا حبيبتي ثواني

دي النظرة حاتريح بالي
وحا أحس ان الوقفة دي ليا
ما هو مش معقولة فيه لسة انسانة خجولة
في الأيام دي وعصر الننت
بصي يا روحي يا أجمل بنت
أنا حا أعمل حيطتي سبورة
وعا الحيطرة حا أكتب تليفوني
راح تاخديه علشان نتواصل
وساعتها راح تلغي ظنوني
يا حبيبتي ما تردي عليا
دي الوقفة وجعت رجليا
أيام بتعدي وأيام
وأنا حاسس إن دي أوهام
أنا خايف تطلعي من الجان

بتشأغلي أضعف انسان
لو أنتي صحيح واقفة عشاني
ارميلي طب حتى سلام
لامتي حا أفضل مستني
دا أنا قلبي متعلق بيكي

(٣)

ورسملك صورة في خيالي
ان أنتي أجمل إنسان
وفي يوم كدة واقف سرحان
بعد اليأس عليا ما بان
راح شباكك قام مفتوح
ردت فيا ساعتها الروح
وقولت خلاص حبيبي حيبان
لقيتك كدة قدام نفرين
ومستسلمة ليهم الاثنين

وكانوا بيتحارشوا بيكي
وشوية وقلعوا فستانك
والصدمة شوفتها في عنكي
وعنيكي بتبص عليا
وكأنك تستنجلي بيا
وبسرعة لبست النضارة
وفي ثانية كنت في الحارة
وفي ايدي ماسك نبوتي
وأنا خايف من الصدمة تموتي
وفي لحظة كنت في شقتكم
والشقة مليانة نسوان
نسوان وكانت مرصوصة
ولا كلمة والكل جبان
ولاقيتك في الأوضة محبوسة
مزنوقة جنب الشباك

وبسرعة رفعت نبوتي
وأنا هاضرب كدة في المليون
لقيتك يا حبيبتي ساعتها
مصنوعة في هيئة انسان
أتاريكي بروفة لفستان
وحبيبتي طلعت تمثال
تمثال لعب بخيال

كسرت ضهري

(١)

قلت لصاحبي مرة في بيتنا
بنت جميلة في وسط حارتنا
أنا حبيتها واتمنتها
بس يا ريت أعرف نيتها
قمت يا صاحبي بعتك ليها
علشان تعرف بالنسبالي ايه حكايتها
كلمة ونظرة تكون قسمتها
ولما أعاتبك تنسى صداقتي وتقول حبيتها
ماشى يا صاحبي لو دي سعادتها
طب خدلي بتاري منها يا صاحبي
ما هي حبيبتي وكسرت ضهري
ونسيت حبي وشوقي وسهري
ورضيت بيك ورفضت مهري

أوعى يا صاحبي في يوم تخدعها أو تخذلها
ومهرك مهري وشوقك شوقي
وسهرك سهري
أنا اتخيلت يوم زفتكم أنا نقطت بدمعة عيني
وشفت خيالها وهو بيرقص ويا حنيني
ولمحت فؤادي كان بيطبط فوق على كتفي
وكان بيواسيني
وكان بيقولي كسرت زهرك بس خلاص
راح تسعد صاحبك
بص يا صاحبي
خد من عطفي وخلص تاري وصب عليها
ويوم الزفة خدها في حضنك وبوسلي ايديها
وخذ من شوقي وابعتلها جوه عينيها
أيوة احرمها من الحرمان
عزب فيها وصب عليها نهر حنان

(٢)

خد أحلامي وخذ أشعاري
خلي كلامي اللي حاتقوله كله هيام
وخلي حياتها وهي معاك أسعد أيام
لو كان تاري كله حنان خلص تاري منها يا صاحبي
وبعد وصالي وبعد حناني اللي وصلته أنا كدة مرضي
أنا ح أنساها وانسى حنيني
وأنت كمان راح تفضل صاحبي
عشان تسعدها – وأنا حا أستحمل كسرة ضهري

ابن عمتي

(١)

وأنا قاعدة في غرفتي
ورواية شغلاني
وكانت بتمسني
وبتحكي عن وحدتي
وبتحكي عن حالي
جرس الباب ضرب
جريت أفتح الباب
وعنينا جوه الكتاب
وكننت أنا لوحدي
وبيتنا كان خالي
ما هو بيتنا من دورين
دورنا والبتاني
لقيت ملاك م السما

وجماله رباني
قلبي ساعته انخلع
ودق في ثواني
قالي مساء الخير
مش برضه بيت خالي
عقلي لقيته قالي
يا ريته كان هنا
ولساني قام قاييل
اسأل في الدور الثاني
ما أبويا زي وحيد
طول عمره وحداني
بص في وشي وضحك
طالع ببطء لفوق
وعنيا بتلاحقه
وعنياه ملحقاني

(٢)

وأنا متسمرة ع الباب
 وحلاوته وخدانني
 أمي وأبويًا جم
 وطبو على سهوة
 وكانت عنيا لفوق
 وكنت سرحانة
 ورقبتي متشعلاقة
 فوق على الباسطة
 وهما لم جم أصبحت
 أنا في ورطة
 وأبويًا يقول لأمي
 الببت دي مالها
 عمال أنه لها
 ولا هي سمعاني

وأمي كانت بتقول له
ولا حتى شيفاني
شوية لقيت أمي
على كتفي ضرباني
وأبويا صوته علي
من الصدمة صحاني
لا عارفة اللي جارالي
ولا الخيبة اللي جيانني
وبقول ملاك يا ربي
ولا دا يطالع مين
يا رب يطالع بشر
من البنني آدمين
تقولوا سنيين وسنيين
يا ترى الجمال دا كله
حيبقى قسمة مين

(٣)

سرحت بخيالي
 والفكر أعياني
 بيتنا غريب
 أول مرة يخشه غريب
 وغريب شاب
 كل اللي جالنا شعر وشاب
 أو أقرع جالنا
 مداري القارعة
 بشال أو كساب
 وأنا باتنهد وأقول آه ياني
 فوقت على زغرودة
 جاية م التاني
 لقيت صوابي بسرعة
 بتجري على وداني

أول مرة أسمع زغرودة
غير في شهادة
أو فففي ولادة
لكن عمر ما شفنا الفرحة
لواحدة عروسة ولايسة الطرحة
وأنا بافكر كدا وأنا سارحة
لقيت صاحبتي فرحانة قدامي
جاي تقولي جاني
عريس وجماله رباني
قولتلها ميت مبروك
وانا قلبي بيبي بيبكي
وقولت مش قسمتي
خمسة ساعات مرت
ودموعي غلباني
الباب رجع خبط

(٤)

عليا من تاني
 ودموعي على خدي
 مسحت أنا دموعي
 وخدودي منديّة
 وقولت ليه يا رب
 حظوظي أنا شوية
 قمت فتحت الباب
 وعني يا وجعاني
 لقيت القمر واقف
 بشحمه قدامي
 بص وراح قاللي
 قالولي ناس من هنا
 البيت دا بيت خالي
 بصتله مذهبولة

وانعقد فيها لساني
لحقني ساعتها بضحكة
وقال لي معذرة
ما أنتي ما شوفتنيش
ولا انتي عارفاني
الدنيا دارت بيا
ومسكت أنا دماغي
أبويا قال مالك
وقعت من طولي
يا بت ليه دوختي
مش عارفة مين دوك
دا محمد ابن أختي
أمه بنت عمي
يعني زي أختي
أنا جيت هنا يا خال

(٥)

وهي مشيتني
 خمس ساعات يا خال
 رجاليا وجعتني
 لقيته من ورا أبويا
 بصص وغمزلي
 مش عارفة ايه قاصده
 بصراحة دا غاظني
 دا أنا كنت على السلام
 عمالة أتملى فيه
 وقالبي بيقولي
 يا بت أوعي تمشيه
 وأبويا بكلمه
 وأنا كنت سرحانة
 وماغني بتاخد وتدي

بتقولى يا بت اتهدى
دا حلم وانتي نايمه
وشويه وحتكونى قايمه
فوقت على كلمه والدى
كدا دوختى الراجل
دا بكرة حيبقى سنى
دا جاي يخطبك يا بنتى
ولا حترجعى تعانى
وان كان على شهر العسل
شهر العسل عندي
فى سري كنت باقول
أعاندين يا حاج
والقمر طلع عندي
ما طلعتش فى الثانى
سرحتى تانى ليه

(٦)

قوليلي ايه رأيك
في محمد ابن أختي
اللي انت شايفه يا بابا
لو كانت دي قسمتي
وماكنش فيه غيره
يبقى دا آخر بختي

الدبلة

(١)

وسابني في وسط الطريق
والدمع جوة عنيه
ودموعي علي خدي
لقيته خلع دبلة
والعرشة فوق ضبطه
ولف وشه بعيد
لاشوف في عنيه دمعته
وحطها في يدي
وقالي ما فيش أمل اننا نكمل
قولتله ليه بتقول كدة أنا ممكن أتحمل
قالي ظروف في علي قدي
ومش عايضة تتعدل
قولتله نصبر وهي هتعدي

قالى يا ريت دا كان أملى وكان ودى
 خايف عليكى من الأيام
 والفقر يجى عليكى يبان
 وأنا ظروفى على قدى
 وراح مطبطب على يدى
 ومد ايدى يودعنى
 لقيت قلبى بيوجعنى
 وقالى كدة خلاص باعنى
 وجاى بسهولة يودعنى
 هو دا كان حب ولا كان بيخدعنى
 وجريت ايدى ورا ضهرى
 تقول لأ بتمنعنى
 مش حا أودع إلا لما يقولى ليه
 مش مصدق انى ح أخسر حنان ايدى
 أو مصدق مش حا أشوف بسمه عنيه

وهو بيسلم عليا وأنا بسلم عليه
طب فين كلامك اللي يوم سمعتهولي

(٢)

وانك معايا للأبد ولغيت ظنوني
فين بحبك كل يوم باعلى صوت
واخر كلمة في التليفون بحبك موت
ومش حايفرق بيني وبينك إلا الموت
وحروف أسامينا وقلب وسهم
على كل شجرة كان محطوط
قول في ايه - قولي مالك
يا ما حاربت الدنيا عشانك
ولا عمر شغلني ايه أحوالك
كان الي شاغلني هو حنانك
خلاص كله انتهى - لما الدبلة قلعتها
دمرت قلبي وقتها

لبست ليه قلبي السواد
علمته ليه معنى الحداد
قولي راح فين الوداد
خلاص الحب راح - زرعت في قلبي الجراح
عمرك شوفت بينا فرق
غير سهم وقلب بيني وبينك
لو شوفت الدمع في عنيا - ألقى الدمع في عينك
أنا وأنت كنا قصة وحكاية
أنا وأنت كنا أصل ومرايا
لو أضحك تضحك - وتملي الدنيا ضحكا
لو أزعل تزعل - وتبكي بسرعة ويايا
ليه دلوقتي بقيت قلقان
دا أنا حبيبتك وأنت كمان
وقابللة ظروفيك
صحح ظروفي مش هيه ظروفيك

وهو دا الي مزود خوفك
وأنا من طبقة مختلفة شوية
وانت خايف برضه عليا
(٣)

وممكن ده يآثر فيا
ما استحملش العيشة على قدك
صدق قلبي وصدق قلبك
ولا انسان في الدنيا دي نذك
ارجع لـ
دا أنت يا روعي نن عنيا
وما يفرقشي العيشة على قدك
وأنا راضية يا سيدي بأوضاعك
عاشان خاطري
رجع الدبلة لصباeck

نظرة

(١)

البت اللي دارهم لازم حدانا في الدار
 بصتلي بصة سحرتني
 وعينها وعيني جالو حوار
 من أول نظرة ملكيتني
 وبجيت اسير حوالين الدار
 من يوم ما عنيتها أسرتني
 بعديها اختفت عن الأنظار
 سابتلي الهم وسابتني
 وبجيت أفكر ليل ونهار
 ما هي سرجت عجلي وسرجتني
 يا حلوة ياللي جوة الدار
 حرمانا ليه من طلعتك
 والله بعدك علينا طال

ومشـتـاجـين لبـسمـتـك
دا جـلـبي جـايد جـواه نار
طفـيـه يا جـلـبي بهـلتـك
وجـلـبي كـاتب فيـكي أشـعار
يـمـكـن أنـول حـنـيتـك
تـعـبـت لف بـره الدار
ومشـتـاجـين لرؤيتـك
يـاريتـني في داركم كـنت جـدار
كـنت حا أشـوفـك ليل ونهار
وما أتـحـرمش من نظـرتـك
بـدل مـالـف بـره الدار
ومـحـرومـين من طـلتـك
في مـرة جـولت أخـد قـرار
وأخـبط وأسأل عـلى أي جـار
تـجـوم تشـوفـني تـفـتـكر ديك النـهار

(٢)

وتفتكر لغة عيونا والحوار
رجعت جولت ماهش أصول
علشان أنول نظرة عيون
أخش دار من غير ماجول
ودي حرمة دار - وكل دار وفيها أسرار
وبعد الصبر بيا ما طال جابلتها
جابلت جلبى بدر البدور
وجولت من غير مالف وأدور
بصي يا جلبى يا أحلى الحور
باجى عالقطن ٣ شهور
أبيع محصولنا وحاجى على طول
وأجيب أبويا ونيجى نزور
وجولى لأبوكى يجمد جلبه
ويطلب منى أغلى مهور

وأى عفش مهما يجول
وأنا الكسبان يا ست الدار
يكفيني يا جلبي تجيني في الدار
وتبجي ملكي ليل ونهار
انشاء الله أعيش في خدمتك
وأشوف في الضحكة نغذتك
وأعيش معاكى بجه في النور
بدل ما بسرج نظرتك

على الأصل دور

يا عيني على جدع خد واحدة مش توبه
ابن أصول مقتدر باين على توبه
وهي قليلة الأصل بقت رقعة فوق توبه
حطت دماغه في الطين والطين كان روبه
لا قادر يسيبها ويبعد ويقول خلاص توبه
بيت الأصول يتبني صح طوبة فوق طوبة
والبذرة عشان تنغرس - الأرض تكون صالحة
مش أرض مخروبة
والمية عشان تروي ما تكونش الأرض معطوبة
الجدع لما يحب يحب بنت رجال
تصون عرضه وتخوض معاه أهوال
ويكون الفرع عدل
مايكونش فرع ومال
بنت الأصول دايماً تكون فرصة خليك ليها خيال

وبلاش قليلة الأصل ولو كان معاها المال
بيتها معاك من قش مع أول ريح ينزال
لكن بيت الأصلية بيدوم لو حتى قام زلزال
دور دايمًا عليها واختار لابنك خال
عشان خلفتك تدوم ويبقى ليك سلسال
وتتباهى بعزوتك وتعيش في أحسن حال
ودور على الأصل ولو مشيت أميال

الشغالة

(١)

اوعى في يوم تقولي يا ريت
يا ريت الخطوة دي ما خطيت
وتحطي بذرة خبيثة في البيت
كان فين عقلك قبل ياريت

تعبت من شغل البيت
راحت مكتب تخدم
كان صاحبه شخص لئيم
ما يبصش ع الأخلص
وبيشغل أي حريم
منهم حريم بتروح
وفيهم بنات بتبات
قالت محتاجة بنات

ولا زوج ولا التزامات
ولا ابني سخن شوية
محتاج للحميات
ولا ابن عم جوزي
خبطته عربية ومات
ومسافرة ودي واجبات
مش واخدة ع الستات
وشغل التلت ورقات
وروها صور لبنات
معظمهم كانوا عاهات
تربية ناس خواجات
قالت محتاجة ديه
أتاريها بت شقية
نقيتهاع الففرازة
تقولشي فينو وطازة

(٢)

أو وردة جميل في فـازة
لو كانت المدام بتغير
لجابتها ببق كبير
والجسم ثقيل برميل
لكن ثقتها في جوزها
منعها م التفكير
مع أن جوزها دا زير
عمره ما ساب ولا واحدة
إلا أما عاكس فيها
بكلام حلو وتخدير
أنا قلبي ليك بيميل
امتى حتميل يا جميل
لكن في بيته مؤدب
تشوفه تقول دا أمير

وبطل يروح القهوة
رزق وجاله على سهوة
وعنياه ع الشغالة
ملاحقها رايحة وجاية
لو حتى حترمي زبالة
ما عنيه زايغة وبريالة
والعقل كأنه مفيش
وبيجري ورا الحرافيش
عربية تقول ع الزيرو
ولا كاسرة حتى الزيرو
كان فين الجمال دا يا ناس
وكان فين مخبينو
دا اللي حايدها في يوم
ربنا يبقى يعينو
البت جابته ع طول

(٣)

تقولش عمل معمول
 لعبت على طول في دماغه
 ودماغه كانت تعبانة
 والببت كانت سهتانة
 شاغلته بمياعة ولبانة
 على طول أتبدل حاله
 لما اتسحر لجماله
 وشوية اتعلق بيها
 وكانت بت سفيهة
 كانت من ورا مراته
 تبعته بوسة بايديها
 لحد ما سلم ليها
 زوجته ماكنتش نبيهة
 ولا لحظت حاجة عليها

كل اللي همامها في بيتها
الشغل اللي في ايديها
والبت رايحة وجاية
تغمز له قوام بعنيها
في لحظة سلبت عقله
لو عقله نضيف وكويس
كان عقله قوام بحالقلقه

لما سلبت عقل البيه
عملت خطة ولعبة عليه
إن مراته بتحب عليه
وبدأت تقوله كلام
وزن ع الودان
بكذب متساوي

ولا كدبة الحواوي
وبدأت شغل با الاعيبها
وانت يا بيه ابقى راقبها
(٤)

واحد قالي في التليفون
من كام يوم انه حبيبها
عنييه طقت شرار
وحياته بقت مرار
وليلة أصبح نهار
وبطل ساعتها ينام
وبدأ الشجار أيام
وبدأ يهذي بكلام
ويكيل لها اتهام
خاينة مالكيش أمان
لحد ما طهقها

اشتكت لابوها في يوم
سمعتها في التليفون
بتقوله دا جاله جنان
انفعل فطالقتها
والسيرة بقت في الحنة
اتخرب ساعتها البيت
ونجحت الخطنة

وبدأت تعمل شغل عليه
وقعدت فترة قال تواسيه
عاشان يهدي وتنسيه
وهي أساساً بتغميه
والخطنة الثانية ازاى تأذيه

فعلاً نسي واتعلق بيها
ونسى كرامته اللي مخبىها
من غير ما يحس وكان بيداديهها
لقطت صورة ببوس رجليها
ترضى عليه وبيحائل فيها
(٥)

أصبح خاتم جوة ايديها
حس في لحظة بقيمة الصورة
قال البت دي مأجورة
قال أنا ليا اسم كبير
وليا سمعة كمان في السوق
لو في الصورة حد عرفني
صورتني حتبقى آخر سوء

وبقت الصورة ورقة معاها
لو ماسمعش كلامها في يوم
أو حيرها - حتشيرها
ولا حيشوف ساعتها النوم

وبدأت يوماتي تذل فيه
وتشخط ليلاتي وتنتر فيه
وبقى لدول - عشان مذلول

واتببـدلت الأحوال
والشغل اللي كانت بتقوم بيه
أصبح شغل سعادة البيه
وخلصت الرقة - والبيه صبح سقا
لو قطعت المية - يملى كذا جردل
ويمسح الشقة

لا قادر في يوم يعترض
ولا قادر يقول لأ
والكلمة بقت كلمتها
وكان الست في بيتها
والبيه استلم شغلها

(٦)

لو رد ع التليفون
قول مين بيتكلام
ما ترد وتقول مين
هو انت بتتخيل
ما ترد يا منيل
هات التليفون يا حزين
روح اغسل المواعين
ما تنساش دق التوم

في المطبخ ايد الهون
وابقى امسح أوضة النوم
بتبرطم بتقول ايه
سمعاك ما تبقاش لمض
بعديها روح اتخمد
وبعد ما كان البيه
هو سيد البيت
وتقوله أيوه يا سيدي
القهوة جاية في ايدي
دلوقتي بيعمل قهوة
وشغلته جرسون
دارت الأيـام
دلوقتي صبح خدام
والشُّغلة مرمطون

وبدأت تبتز فيه
وماله ما بقاش فيه
وديونه بقت بالكوم
كمان تجارته بارت
وسمعتة انهارت
وشغله في السوق نام
واتاخذ عليه أحكام
بشيكات بدون رصيد
والبيه بقى ع الحديد
الدنيا في وشه أسودت
ويا ريتها أزمة وعدت
ما خلاص رجليه اتمدت
وجري ورا نزوة زائلة
والكفة صبحت مايلة
وبقت رقعة في وشه
وخسر حياته وعشه

وبدأت تساوم فيه
الشقة بالصورة
الدنيا دارت به
صعبت عليه نفسه
وما فيش حد يهديه
والحكم جه بحبسه
عقله مابقاش فيه
ما أتحكمش في نفسه
ضربها قوام بحديدة
الدم بقى بالكوم
ولبس قضية جديدة
ولما شاف الدم - ركبو ساعتها هم
ساعاتها العقل خف
جالو خبل في الحال
جابوله قميص واتلف
واتحكم عليه بجنان

(٨)

ليه على عقلك يوم خبيت
عاشان نزوة تخرب بيت
دمر حياتيه
ظلم مراته
وشرفها بان
دهب وكهرمان
عشات بت مايعة
أخلاقها ضايعة
وندغة لبان

مظلوم يا والدي

(١)

يا عيني عليك يا والدي
مظلوم في الحيا والموت
الكل غنا لأمه
وليك ما سمعنا صوت
شقيان ليل ونهار
ولا عمرك أشتكيت
حتى أيام الشدة
والدمع كان في عنيك
عمرك ما بينت لنا
ولا حتى في يوم بكيت
الحمل كان تقيل
ولا جيت في يوم نخيت
ما سمعنا منك آه

ما سمعنا في مرضك صوت
 حتى وأنت مريض
 كان همك ما نشلش هم وتسعد كل البيت
 كان كله مشغول بنفسه
 ومهموم كمان بالقوت
 حتى في يوم الضيق كنت تقول دي أزمة
 وانشأ الله في يوم حتفوت
 يا ما شفنا البسمة جوه عنيك واحنا بنلعب
 وكنا بنركب فوق على ضهرك تعمل قطر ونقول توت
 وكنت تخاف لشعور جارك يوم يتأذى
 وكنت تقول النبي وصا في يوم ع الجار
 علشان خاطري وطو الصوت
 علمتنا نووصل أرحام علمتنا حلال وحرام
 وكنت تقول اعمل صالح مهما تعيش لابد تموت
 صحيح الأم خيمة وهديّة ربانية

(٢)

بس انت برضو يا والدي عمود الخيمة ديه
لو وقع عمود الخيمة حنقول بأعلى صوت
يا عيني عليك يا والدي
مظلوم في الحيا والموت
ومشيت ما سمعنا صوت
غير صوت هموم الدنيا
ونسينا نقرا الفاتحة عليك بعد الموت

زعلان منك أكيد

(١)

زعلان منك أكيد
مجرّوح منك أكيد
لكن علشان بحبك
ما أقدرش أغيّظ وكيد
وازاي أغيّظ في روحي
وأنت في قلبي الوحيد
زعلان علشان ظالمني
لو كان من حد ثاني
عمره ما كان همامني
لكن علشان دا منك
زعلي منك شديد
زعلان منك أكيد

والناس تقول يا حرام
اتبه دل م الغرام
يمكن علشان حنين
ما بيعرفشي الخصام
دا عشقه عشق غريب
ما تعرف غيرها وكيد
قولت لساه حبيب
وازاي أكيد في روعي
وأنا بانسى ساعات جروحي
لما باشوفه سعيد

(٢)

لكن زعلان أكيد
وأغيب على قد ما غيب
والقلب يزيـد لهيب
وأنت ولا أنت هنا

ولا تسأل عننا
هو أنت مالکش قلب
يحبس بقلبنا
وارجع أقول لروحي
زادت وياه جروحي
أنا نفسي أبعد بعيد
يمكن يحس بيا
بس العيب الي فيا
رغم أسوته عليا
لو شوفته من بعيد
عنيه بتضحك ليا
بانسى بسرعة القاسية
وارجعه من جديد
وبرضه الأقيه عنيد
وأرجع أعاتب نفسي
وأقول ما تحاولي تنسي

مدام مش عارفة ترسي
دا قلبه من حديد
تقول هو أنت ناسي

(٣)

حبه في قلبي راسي
وساري في الوريد
سألوني ناس كتير
ايه أخرة المصير
على كدة هي حاسة
بشوقك واشتياقك
قولت قلبها كبير
وتعبت م التبرير
قالوا بتحبه لسة
قولت بدون تفكير
بحبه بالتأكيد

لكن زعلان أكيد
مجرّوح منه أكيد
لكن علشان بحبه
ما أقدرش أغيّظ وكيد

تحت الشباك يا جميل عدي

(١)

تحت الشباك يا جميل عدي
لما تعدي والنبي هدي
وانتي يا رجليه اوعي تمدي
أنا في الشباك ايدي على خدي
لو رجلي ورجلك يتصاحبوا
ويقابلوا بعض ويتمشوا
ويقولوا لبعض ويتصارحوا
وتحس بحناني وودي
ساعاتها رجلك هتهدي
أنا في الشباك ايدي على خدي
لو ترمي علينا ولو بصة
لو حتى بصة مخطوفة

مشتاقة لبصة وملهوفة
حتى لو بصة على قدي
ساعتها حا أقول أنا مين أدي
أنا في الشباك ايدي على خدي
يا أرض حارتنا امشي عاكسه
خليه يتحرك في مكانه
لو حد يقابله يكون عارفه
وبقالو كتير وماهوش شايفه
يحكي له ظروفه وأحواله
ساعتها حا أتملى جماله
ولو بص لفوق على شباكنا
يمكن في البصة ياخذ باله
ويحس ساعتها اني بعاكسه
والنبي يا حارتنا امشي عاكسه

أنا في الشباك ايدي على خدي
بالراحة يا شمس على دماغي
دي دماغي بتنز وبتندي

(٢)

وصداعها بيروح لما يعدي
وياساعة بيتنا أوقفني اتهدني
ساعة ما يمر وها يعدي
أنا في الشباك ايدي على خدي
أنا عيني عا الحارة مراقباها
لاحسن يعدي على غافلة
لو عدى وما خدتش بالي
حبص لعيني معتباها
وأخيرًا أتحقق هدفي
في مرة ماشي وبتعدي

في حاجة غريبة حصلتلي
لقيت عيونك بصتلي
ساعاتها رجلي ما شاليتني
وفجأة ضوئك خد بصري
وبقى شوفي على أدي
والنبي كررها ثاني وعدي
ولما تعدى والنبي هدي
أنا في الشباك ايدي على خدي

أم العيون السود

(١)

يا أم العيون السود
والرمش عليه ممدود
عذبتني ياما قلوب
كأنه عذاب مكتوب
ياريت عنيكى تجود
بنظرة ع المشدود
بينك وبيننا سدود
والكل ليكي مشدود
حواليكى كثير معيوب
وجمالك مالو حدود
حتى في شد العود
قوام مالوهش عيوب
وعسلأك مالى أخدود

ما أنتي جمال محسود
 لأصبر برضه حدود
 وربنا المعبود
 يا أم العيون السود
 قوليلي مين أدك
 قطفت ليكي ورود
 يمكن أنول ودك
 لقيت تقاوي الورود
 متاخدة من خدك
 الريحه ريحه العود
 والمسك من قدك
 مهما نروح ونعود
 والرقه شيء موجود ياللي الأدب رقصك
 ابداع رب ودود
 سباحان من خلقة

(٢)

لـقـيـتـك ضـي ونـور
والشـمـس بـتـبـادـلـك
والقـمـر صـبـح مـكـسـور
لـمـا انـكـشـف بـدرك
والأرض طـرـحـت حـور
مـن لـمـسـة مـن قـدمـك
والـحـزـن بـقـى مـسـرور
لـمـا لـمـح وـجـهـك
يـا أم العـيـون السـود
عـديـنـا لـيـكـي سـود
يـمـكـن نـنـول نـظـرة
مـن نـظـرة جـالـنا شـرود
ووقـعـنـا مـن نـظـرة
بـالـراحـة يـا صـبـيـة

أنا قلبي كان مخضوض
وانتي معديّة
ما جمالك جمال مشهود
وملكات جمالنا قرود
وأحلى واحدة رديّة
بالاعتراف وشهود
حتى الذكيّة غبيّة
يا أم العيون السود
ما تمنكيش ليا
حتبقى حياتي هموم
والكل لازق ليا
ولا أشوف معاكى النوم
من كتر الملاغية
في الحال يجيني جنان
يا حكون عليكى سجان

(٣)

خليني بعيد أحسن
خليني كمان في أمان
صحیح غالية عليا
بس أنا ماليش أتهان
ولو أنتي نصيب غيري
خليني مع اللازقين
وف ايدي ليكي هدية
يمكن أنول الرضا
من كتر الملاغية
يا أم العيون السود
والرمش عليه ممدود
سبحان من خلقتك

والنبي يا غزال

والنبي يا غزال أنا بالي مشغول
والنبي يا غزال
ما تغيب على طول
طب هي أصول تمشي ولا تقول
طب خلي الود معاك موصول
انشاء الله برنة من المحمول
وحشني لقاك أنا حاستناك
مهما غيابك كان هايطول
أنا قلبي اتعلق بيك يا جميل
وبعدك طال وأنا قلبي عليل
قولي ليه محتاج لدليل
بعد قلبي ما شوفته بيميل
وأنا قلبي بيعشق كل جميل
وأنت أجمل ما في الكون

والنبي يا غزال القلب أهو مال
والنبي يا غزال خليني عالبال
وبلاش يا جميل تغيب على طول
أو ييجي اليوم وتنسانا
طب دا أنت عشقك جوانا
قلبي قفل عليك جوة
وقالي عشقه دا أمانة
عمري ما أفرط فيه أبدًا
لو سيبته يوم يبقی خيانة
خايف تمشي وتنسانا
ناس كتير كانوا حسدانا
لما ودك كان موصول
والنبي يا جميل ما تغيب على طول
وحشني لقاك أنا حاسنتناك
مهما غيابك كان هيطول

اوعى تسيبني

(١)

اوعى تسيبني حتعذبني
ولو حتسيبني بلاش تألمني
وسيبلي الذكرى الحلوة معاك
ولو شوفتك صدفه بلاش تحرمني
سيبني أتملى من رؤياك
ياللي عذابى هو دواك
ياللي بكايا بيستهواك
مهما عملت أنا مش حا أنساك
دا أنت الروح والعين والقلب
ياللي عنيا ما شايفة سواك
مش متخيل يجي اليوم اللي حاتسيبني
وأعيش باقى عمري على ذكراك
دا أنت خيالك ياما مساني وياما صبحني

رؤيا خيالك بيغذياني
حتى القوة كان يمنحني
ولو زعلان زعلك يدبطني
دا انت النظرة في وشك راحة بتريحي
قول في ايه غير أحوالك
بعد ما كنت مريح بالك
حد في زعلك غيري أنا شالك
مين اللي شغلك وشغل بالك
مش حتلاقي في يوم اخلاصي
دا أنا حبيتك حب جنوني
وكنيت بخالف كل ظنوني
يجي اليوم اللي تهجرني أو تنساني
أو يجي اليوم وتعيش من دوني
كل الناس ياما لاموني
وعاشان حبك بيحاربوني

(٢)

حتى الروح والعين والقلب رجعوا لاموني
علشان حبيتك حب جنوني
لو حسيبني اوعى تعذبني
وسيخلي الذكرى الحلوة معاك
ولو شوفتك صدفه بلاش تحرمني
سيبني أتملى من رؤياك

كام الساعة

(١)

كام الساعة يا حبيبي في ايديك
ليه متأخر عن مواعيدك
٣ دقائق ليه تأخير
برج في عقلي كان ح يطير
دا كل دقيقة زيادة بتفرق
لأنني باعيش جواها كثير
دا كل دقيقة بتغيب فيها
بلاقي الدنيا تغيب معانيها
هي الدنيا تبقى دي دنيا
إلا لما باشوفك فيها
حتى الثانية
حتى الثانية معاك يا حبيبي
بارجع أقسم فيها حلقات

وكل حركة باركز فيها
علشان بارجع أعيش معانيها
همست مرة وبصت مرة
ضحكت مرة وزعلت مرة
بعد ما أقابلك عقلي بياخد فيها وهات
والدقيقة معاك يا حبيبي تروح لساعات
ليه يا حبيبي ميعادك فات
شوف كام كلمة باجهز فيها
ولما بقابلك أعبر بيها
وشوف الساعة بطيئة ازاى
قبل ما أشوفك
وشوفها بتجري معاك ازاى
وأنت دقايقى تضيع فيها
علشان عارف قلبي كبير
فكرك يعني مش ح أتكلم ع التأخير

(٢)

وجاي تقابلني عنيك بتغني
جاي متأخر وأنا مستتني
عجبك يعني حرقه دمي
وقللي عليك
قولي الساعة كام في ايديك
والله وحشني الشوق في عنيك
عايز تعرف شوقي إليك
وبتجربني في خوفي عليك
تقوم تتأخر ٣ دقايق
يعني مية وثمانين ثانية
مش ح أتهنى فيها بعنيك
ليه بتبتسمي وأنا مدايق
وجاية تقولي خليك رايق
بص وشوف الساعة دي كام

ساعتك سابقة بتاعتي دقائق
يعني أنا جاية قبل ميعادي
وأنت ظالمني في التأخير
يعني أنا برضه
أي دقيقة معايا بتفرق
لأني باعيش جواها كثير

أفتح ولا أغمض

(١)

أفتح ولا أغمض يا مين يدلني
جماله يا ناس فتني وعنيه بتشدني
أنا خايف أفتح عيني من بعد ما شوفتها
لاحسن تلوث عيني من حد بعدها
يا مين ياخدني مغمض ويروح يقولها
القلب دا بيحبك ويحنن قلبها
أنا مش ح أفتح عيني غير لما تحس بيا وتبين حبها
ولما تحس بيا ح أفتح وقتها

بعديها عنيا عاتبتني
وقالتلي ليه كدة ضررتني
أنا كنت عايشة ومرتاحة

ولا حاجة أبداً زلتني
وكنت سارحة وسواحة
وعمر الدنيا ما أمتني
لحد ما أنت استدعتني
وورثني صورة بهرتني
ومن ساعتها بلف وأدور
على أجمل واحدة شغلتي

بلاش يا عيني تعاتبيني
وحاولي معايا تساعديني
بنظرة منك أو بسمة ممكن تحن وتجيني
ولما طال العتاب بينا
عنيا حسرت بحنياني
وبدأت تلاغي في عنيتها

لحد ما ابتسمت ليها
ساعاتها طرت أنا م الفرحة
وبرضه شوفتها في عنيتها
ولقيتها برضه كانت سارحة
أول ما سلمت عليها

(٢)

وأول ما لمست أيديها
لقيت أيديا اتطهرت
وما حستش ساعاتها بأيدي
ولاقيت صوابعي اتخدرت
وبطلت أسلم بيمينني
وأقول للناس اتعورت
وأيديا ساعة ما بسلم
من كتر العرق مطرت

والأرض شربت عرقي
فرحانة ما هي اتعطرت
والجزء اللي كان بور أو صحرا
في لحظة الصحرا خضرت
والأرض من عطر إيديها حوالينا الدنيا زهرت
والشمس من بعد غيابها لما شافتها نورت
خلاص حا أفتح عيني ما حبيبي حبني
ولسة برضو فاتني
وعنيه بتشديني

ابن الأنفوش

(١)

اسـكـنـدـراني وحبـيـتـه
من نظـرة من عينه هويـتـه
سألـت قالوا دا أنـفـوشـي
أنا ياما شـفـت جـمـال ياما
بس جـمـالـو ما شـفـتـوشـي
يا دنيا حـوشـي عـنـيـه حـوشـي
أبو عين جريئة الأنفـوشـي
بقيـت أسـير نظـرة عينه
لو غاب في يوم بقول فيـنه
محتـاج للجرعة الي في عينه
أعـيش عـلـيـها بقيـت يـومـي
وأحـلم بالبـسـمة سـاعـة نـومـي

فيه ناس لاموني يا أنفوشي
 وکمان قالولي ما ترحلوشي
 وان رُحت ما تبينلوشي
 هو انتو يا ناس ما بتقروشي
 دا ساحر قلوب ولا تدروشي
 د أنا خايف الرمش يجي ع الرمش
 يعدي في غمضة ما شففهوشي

طب حد يقوله يهدي شوية
 عشان لو هدي تشوفه عنيا
 ولا أبعتله حد يحوشه
 يعطل فيه وساعتها ح أشوفه
 دا كل مكان بيروحه بادوسه
 واخطف نظرة وعيني تبوسه

بطل يا واد تسبيل في عنيك
كدة بتلم الناس حواليك
محدث ياد فينا مالي عنيك
دا احنا يا واد والله شارين
هدي يا واد مشية رجلك

(٢)

طب طمن قلبي وارمي سلام
ولا انت ناوي تجيبلي جنان
وأنا ع الإمة واقف حيران
تختفي مرة ومرة تبان
بطل ياد شغل اللوعان
بعدين فيك يابن الأنفوشي
ممكّن أذك واقلق ضالك
عشان بنحبك ما مابنر ضوشي

حد يقوله ويكون منه
 إن أنا برضه ممكن أجنه
 بس الحب ونظرة عينه
 طب هي أصول كدة بالزمة
 تلطع فينا كدة على الإمة
 ابعت يا بخيل نظرة وكلمة
 ولا أنت غاوي تحيرنا
 طب ابعت بسمة تصبرنا
 دي البسمة لو كانت ليا
 مش ح أرمش ابدأ بعنيا
 ما طيلا يا واد رد عليا
 دي الوقفة وجعت رجاليا
 وأنا واقف مستني الطالة
 في مكان ما فيهوش حتى مظلة

وأنا لسة مفنجل في عنيا
عشان جمالك رباني
حتذل في الناس يا أناني
دي ناس كتير كدة حتعاني
يا زينة البحر المتوسط
دي الناس على الإمة اترست
كأن السما بالناس رششت

(٣)

قولي مين عندك غالي
أروحلو يمكن يتوسط
أقابلك لو حتى ثواني
وأقولك كلمة على لساني
ح أفضل أحبك طول عمري
مدام عيونك شغلاني

وحياة سيدي أبو العباس
بنحبوك يابن الأنفوشي
وقالوا عليا كل الناس
بضيع وقتي بلوشي
يا تحن عليا يابن الناس
يا نسيب الأمة ولا نجوشي
يا دنيا حوشي عنه حوشي
أبو عين جريئة الأنفوشي
خايف الرمش يجي ع الرمش
يعدي في غمضة ما أشفهوشي

نفسى أنساك

(١)

راجع تاني تأثر فيا
عايز تاني تعذب فيا
ياما قاسيت - وياما تعبت معاك مناديا
كم مرة رجيتك واستنيتك انك تيجي وتسمع ليا
كم مرة راضيتك وياما تعبت معاك مراضية
ارجع تاني وافضل أعاني جحودك ليا
وارجع اطبب تاني على قلبي
وقلبك قاسي مفهوش حنية
ولا اشتقت لدمع عنيا
ابعد عني الله يخليك
هو عذابي وحرقة قلبي دا بيرضيك
قلبي ضعيف الله يخليك
دا أنا كل ما أمد الخطوة أنساك

لفنة بنظرة برجع تاني أدوب في هواك
 ورغم بعدادك وأقول حا أنساك
 كل ما افتح عيني ألقاك
 وكل ما أغمض عيني ألقاك
 ما أنت معشش بين الجفن وبين النني
 رغم شغفي نفسي أنساك
 هي دمة عيني بتستهواك
 ابعد عني الله يخليك
 هو عذابي وحرقة قلبي دا بيرضيك
 جي بتطلب نطوي الصفحة بصفحة جديدة
 طب أنت قاسيت صرخة تنهيدة
 ولا كرامتك منعت عنك دمة حزينة
 ولا نويت تطعن قلبي طعنة جديدة
 ابعد عني الله يخليك
 هو عذابي وحرقة قلبي دا بيرضيك

(۶)

قلبي ضعيف الله يخليك
أنا عودتك تاخذ مني عطفي وحبتي
ولاتـــــــــــــــديش
وكل مرة كنت أواعدك
وكنت تسـيبني دموعي على خدي
ما ترحمـــــــــــــنـيش
ابعد عني - وسـيبني لهمي
ابعد عني وسـيبلي الذكرى عليها أعيش
وبعد ما أقرر أكسر قلبي وأقول ح أنساك
ترمي البسمة أرجع ثاني أدوب في هواك
ابعد عني الله يخليك

* * * * *

سافر ما تجيش

من حقط تغضب وتسببني
 وتسافر ولا ترجع عايش
 من حقاك تسمع لعواذلي
 وتصدق ولا تسمع عايش
 وأوعدك وأفضل مستني
 في الآخر ترجع ما تجيش
 من حقاك تمشي ورا شكوكك
 وتصدق وسوسة الناس
 وأبرر ما تصدقنيش
 من حقاك تغضب وتسافر
 علشان حسستك وكأني
 من غيرك مش حا أعرف أعيش
 اخلاصي وحببي وكياني
 وسهري وسهدي وأحزاني

في حبك ما بیشفعليش
صدقني غرورك جنني
وبيدي العين والنني
وف كل مرة تأنبني
وتهدد وتقول حاتسيبني
وأسامحك وأتريك ما تبني
أتاريك بتحب الملكية
وواخذ الحب بأنانية
علشان كدة غاوي تهني
وتهدد وتقول حاتسيبني
صدقني سافر ما تجيش

حابة حابة

(١)

أوعى يا قلبي
الحب شففته بدب دابه
ريحته طلعت شميته هابه
أوعى يا قلبي حتعاني تاني غدر الأحبة
لو حُبه جي طب حابه حابه
م قلبي قاسى مش حمل دقه
يا ما شاف وياما عانى
من عذاب غدر الأحبة
لو جاي يا حب
ادي قلبي نقطة نقطة
أوعى تغلط وتكون له سقا
جرعة زائدة تسببله صادمة
خليك معاه حابه - حابه

وأنت يا قلبي فكر شوية
خليه صديق بلاش محبة
أنت شففت غدر الأحبة
هو ساحبك للهلاك
بس ساحبك حابه - حابه
حتى لو شففته ملاك
خلي بالك من هواك
اللي قتلت صاحبها ديه
وهو ساحبك حابه - حابه
هي حلوة صحيح وشابه
بس أنت مظلوم من أحبه
وإن كنت ناوي في يوم تحبه
حبه بس باللهواده
حابه - حابه أنت حابه وهو حابه

(٢)

أوعي حُبه يصير عبادة
دول دبابه - غاوين سيادة
وأنت مظلوم من أحبه
أوعي تزيد عليه في دقة
هو دقة وأنت دقة
هو حابة وأنت حابه

فكيها يا روعي وعديها

(١)

فكيها يا روعي فكيها
مش لايقة التكشيرة عليكي
ما أنا شايف البسمة في عنيك
ومش عارفة حتى تخبيها
عاشان عيونك فضحاكي
وحنانك مؤثر فيها
فكيها يا روعي فكيها
لو صدرت مني حاجة عفواً
ممکن أنا وأنتي نسويها
ما هو قلبك أبيض وأنا عارفة
أوعي تصدقي ممكن أخالفه
دا أنا قلبي ساعتها يدمرني
لو حس بالقسوة عليكي
أو ممكن حد يغيرني
ما هو قلبي يا روعي عايش ليكي

وبيحاول دائماً يراضيكى
 بس انتى دائماً ظلمانى
 سألوني الناس عنك مرة
 أنا قلت كيانى وروحي فيها
 لو بعدت عني ولو لحظة
 ساعتها أنا ممكن أروح فيها
 لو ظهرت حاجة كدة بينا
 ممكن بالحب نداويها
 فكيتها يا روجى فكيتها
 عارفة يا حبيبتي أنا باتصور
 لو قلبي قصر ومتصور
 حتكوني في القصر دا أميرة
 دا انتى يا روجى ما فيش زيك
 واللى يشبهلك أكيد غيره

(٢)

والنبي بلاش التكشيرة
 فكيتها يا روجى فكيتها

أم الخلاخيل

يا أم الخلاخيل يا سارحة في المرعى
بسمة يا واد يا جميل دا أحنا قلوب والعة
ولا أنت يا بني بخيل والبسمة مش طالعة
ندهت عليكى كتير ليه عاملة مش سامعة
والدمع ليكي بيسيل قوليلي لو بايعة
يا أم الخلاخيل يا راجعة ع الوادي
قوليلي أهلك فين وساكنة ف أني ضايعة
غلبت شهور وسنين تعبت وبنادي
يا بنت وادي النيل يا مشعللة فؤادي
عطشان محتاج لسبيل اسقيني م الوادي
شاورت ليكي كتير وانتى ف تاني وادي
تعبت م التفكير يا زادي وزوادي
أنا برضو شاب جميل وليا روادي
بس انتى اللي خطفتي قلبي من نظرة ف الوادي

يا أم الخلاخيل يا ريتني أكون شالك
أحميكي يوم البرد والشرد لو جالك
امتى هايجي اليوم وأبقى شاغل بالك
وأكون ستر وغطا ومالي يكون مالك

شجر الريحان

(١)

هز يا ريح شجر الريحان
ووصل ريحته قصاد منه
خلي حبيبي يظهر ويبان
ويجري على ريحته يشمه
وأشوف حبيبي قصاد مني
ما حبيبي غايب من زمان
والقلب كان محروم منه
ويشوف عيوني وأنا ولهان
وياخد باله في يوم مني
لو حد يقوله بص هناك
وبايده عليا يشاورله
يقوله هناك قلب بيهواك
بص عليه واتبسم له

ويحس بالشوق في عنيا
 والدنيا بتضحك حواليا
 لما باشوفه وعنيا حواليه بتطوفه
 وفي وشه حمرة من الخجلان
 لما باقوله كلمة حب
 والضّم الكلمة مع اسمه
 وأقوله بالهمس حروفه
 وأقول يمكن كلامي يآثر فيه
 ويساعد مع الشوق في عنيا
 والأقيه في يوم حن عليا
 هز يا ريح شجر الريحان
 ووصل ريحته قصاد منه
 بلغ حبيبي في يوم يا ريحان
 أنا اللي زاقق عليك الريح
 وباعت رسالة شوق وحنان

(٢)

عشان يحس بقلب جريح
هز يا ريح شجر الريحان
ووصل ريحته قصاده منه
يمكن حبيبي يظهر ويبان
ويجري على ريحته يشمه
دا حبيبي غايب من زمان
والقلب كان محروم منه

للتواصل مع المؤلف

Email: hh5968665@gmail.com

الفهرس

٣	الست دي مين
٨	وتسأليني من أنا
١٣	راح حبيبي
٢٣	الدنيا مليانة تجارب
٣٢	جمر الدار
٣٩	العيلة
٤٧	العضمة كبرت
٥٤	صحوة ضمير
٥٨	عنقرة
٦٢	مراتي وأمي / وأمي وحماتي
٦٨	عظمة الجنية
٧٦	ناموسة شقية
٨٤	الحلة فوق النار
٩١	ليلة دخلتي
٩٧	حبيتي اللي غدرت بيا
١٠٦	تبتة
١١٣	يا دنيا ليه معنداني

١١٩	موال الفول
١٢١	أصل الصورة
١٢٩	عيد الميلاد
١٣٤	مانيكان
١٤١	كسرت ضهري
١٤٤	ابن عمتي
١٥٥	الدبلة
١٦٠	نظرة
١٦٤	على الأصل دور
١٦٦	الشغالة
١٨١	مظلوم يا والدي
١٨٤	زعلان منك أكيد
١٨٩	تحت الشباك يا جميل عدي
١٩٣	أم العيون السود
١٩٨	والنبي يا غزال
٢٠٠	او عى تسييني
٢٠٣	كام الساعة
٢٠٧	أفتح ولا أغمض
٢١١	ابن الأنفوش
٢١٧	نفسى أنساك

٢٢٠	سافر ما تجيش ..
٢٢٢	حابة حابة ..
٢٢٥	فكيها يا روعي وعديها ..
٢٢٧	أم الخلاخيل ..
٢٢٩	شجر الريحان ..
٢٣٣	الفهرس ..